

5563.8
5024.1
Y.4

祭文 碑銘

墓碣 墓誌

劉齋集

卷四

共七

BERKELEY
LIBRARY
UNIVERSITY OF
CALIFORNIA

Opportunity.

剛齋先生集卷之七目錄

祝文

沃川龍門影堂奉安性潭先生文

春秋享祝文

知禮興禮祠奉安尤菴先生文

春秋享祝文

懷仁興仁祠尤菴影幀改摹奉安告文

興仁祠奉安性潭先生文

春秋享祝文

鎮岑栗里祠四賢春秋享祝文

栗里祠追享趙近水鄭竊村申晦谷文

春秋享祝文

延豐源泉祠告直齋李先生文

源泉祠追享醉石鄭公文

尚州道川社春秋享祝文

永同金氏世德祠追享金十清金鶴洲二公文

尚州東華社祀成東郭成華隱文

春秋享祝文

安東竢德祠祀法川柳川二姜公文

竢德祠抱翁鄭公春秋享祝文

報恩屏山書院團隱靜菴兩先生暇享時並告

五先生文

兩先生春秋享祝文

報恩金華祠奉安曹南冥成大谷成東洲文

公州歧湖書社龐村黃公春秋享祝文

公州萬壽洞延平李忠定公春秋享祝文

木川崇明祠春秋享祝文

金堤龜巖祠春秋享祝文

永同花巖書院追配兩賢春秋享祝文

全州湖山影堂奉安兩先生文

春秋享祝文

光陽鳳陽祠朴詡齋

世煦復享文

春秋享祝文

告子婦申氏墓文

家廟焚黃告文

祭文

祭過齋金先生文

祭冉從叔性潭先生文

祭李伯仁

守中文

祭庶三從弟麟圭文

祭金進士 正廉 文

祭宋敬承 翼圭 文

祭宋稽文 欽書 文

祭金系祖 在忠 文

祭族兄僉樞 得圭 文

祭宋聖襄 欽奭 文

祭琴汝聖 舜孝 文

祭金景心 秉淵 文

祭金內之 在精 文

祭庶從叔 煥履 文

祭亡弟學圭文

祭亡室金氏文

祭子婦申氏文

祭弟婦李氏文

銘

海州石潭聽溪堂石井銘

石潭念修齋銘

性菴銘

讀書銘

苟夫巢櫓銘

剛齋先生集卷之七

祝文

沃川龍門影堂奉安性潭先生文

玉溫金精先生稟質銖累寸積先生進德先生之學
得之家傳早謝科場用力斯專六經之外一部朱書
沉潛反覆匪亟匪徐而其收效乃在誠敬簞瓢非憂
存養得正晚際昌辰禮勤玉帛開講 胄筵前徽允
迪久速惟義亟反初服大耄之年常見整肅溪造誰
知成規可仰士林依歸山斗之望吾鄉地近多霑教
雨樛摧幾年羹慕靡寓龍門之堂大老是祀嶽降遺

附錄卷之十一
址實維密邇伊昔先生往來瞻依俯仰興懷遲遲其
歸配侑發論疇不欣簪敬摹遺像涓吉妥奉多士駿
奔式薦籩豆庶幾歆顧永垂啓佑

附
春秋享祝文

質純氣和學遂德尊紹先啓後模範永存

知禮興禮祠奉安尤菴先生文

恭惟先生孔朱正脉栗沙嫡傳繼開業大閑衛功專
明天之理而正人心 聖主有托實天降任九死靡
悔益見弘毅民到于今永受其賜凡有秉彝莫不尊
親遺躅所在俎豆輒陳惟茲春川僻鄉勝地距彼寒

泉不遠而邇何幸杖屨遊賞於斯草木含香山水增輝士林傳誦百年如昨祠享發論聞者咸樂合謀殫誠劈畫有方先摹遺像櫃奉書堂棟宇之役隨力經營爰及三載乃克有成階庭滌滌屋牆持持茲涓穀朝揭虔如儀從今一鄉永有瞻依士風之振其殆庶幾駿奔薦誠牲酒脂香尚冀昭格佑啓無疆

附
春秋享祝文

道貫天人義秉春秋百世尊親明禋恭修

懷仁興仁祠尤菴影幘改摹奉安告文

幘綃年久未免蠹壞改摹敢緩失真是戒謹就家廟

舉檀藏本畫師惟良副我誠惓茲涓穀朝奉新藏舊
多士駿奔式薦籩豆惟我先生有孫文敬資稟溫粹
學務誠正朝廷尊禮士林模範世雖及五澤實不斬
天札屢降曰惟嫡傳矧乎大全年譜之編始終十載
擔夯一己力竭誠殫百世可俟昔創是祠亦蒙指揮
禮儀罔缺士趨知歸追配之論遠近齊發今因有事
肖像以揭儼若趨庭永奉典刑並伸虔告庶鑑微情

興仁祠奉安性潭先生文

猗歟先生文正肖像孫生稟異質金精玉溫早知求道
不爲外誘玩味經傳芻豢悅口自謂質魯功惟百千

屢空亦樂孰奪其專一部朱書聖門宗旨家庭緒業
準則在是乃謝科場反覆涵泳何以反約曰誠與敬
造詣淺深豈敢蠡測蓋聞君子吾儒命脉絡述之懿
人孰間然斯文在茲九臯聞天邱園玉帛禮隆意勤
膺 命胄筵朝野胥欣祭告文正 聖主殊寵基聲
萬年 宸詞鄭重終執爲謙亟反初服士林宗仰如
斗在北山頽幾年羹慕采切俎豆有議有礙初設吾
鄉有祠大老斯享昔稟儀節虔奉遺像爰謀配侑士
論允協况此溪山杖屨攸躡茲涓吉辰乃舉緼禮有
赫其光於千萬歲矜紳濟濟牲酒膾香庶幾歆顧惠

我無疆

附 春秋享祝文

天質之純家學之正近守遠宗奉以究竟敬薦

春秋

丁有光配食願垂顧佑永世無極

鎮岑栗里祠四賢春秋享祝文

行篤孺慕學闡精微祭社有禮永世無違

右白蓮堂
閔公位

忠孝至性潔身以沒遺芬不沫報祀無缺

右濠梁申
公位

尊攘之義復雪之志是父是子一體禋祀

右舟村申
公位

淵源之學進退分明鄉黨興慕報祀以誠

右華菴李
公位

栗里祠追享趙近水鄭竊村申晦谷三賢文

文獻世家聰悟天資妙年高才先進爭推昏朝數倫
尊公在謫屏跡公車陪奉竭力蓋其爲孝至性斷斷
已幽莫過異顏所歎 仁廟改玉遂魁司馬飛不盡
翰命有主者未展所蘊亦關時運縻身陰祿夫豈其
願仍值丙丁時事忍言念絕當世婆娑邱園挺特之
操其孰能追悲憤慷慨詩以發之悼三學士義膽彌
激而其題曆史書之策維茲杞城厥有松楸往來省
掃亦或淹留風韻攸暨誦慕尚爾謂我鄉賢實非誣
已吾鄉之社四賢是祀濠梁志節公實並美追舉殿
儀士無異論伊誰同陞猗鄭窳村曰晦谷公濠舟世

德一堂光耀永垂矜式茲涓吉辰薦以饗豆矜紳齊

邀尚冀顧佑

右近水位

資稟穎秀行篤孝悌冲齡居憂已能守禮自奮爲學
早師大賢門路旣正志操彌堅往復講質弗明弗措
最所用功大學一部行之惟艱服膺至誠務踐其實
近名是戒圃翁有孫溪蒙知獎勉以光前益見期望
攝祀爲重雖從蔭仕而其行止顧皆有義溫繹之勤
在官不廢矜持之嚴到老靡懈連鎮之間愛其山川
于彼蘇浦邁軸幾年遺芬不沫士林誦慕况又茲土
邱墓所寓睽我鄉祠公論斯發遠近嚮合而無凹凸

先享四賢實同聲氣齒序一堂夫豈不韙復誰同陞
近水晦谷高義遂學又皆範俗涓吉蠲饎載舉緝禮
願我顧歆永垂佑啓

右窮村位

挺特之稟超邁之才志厭科場學專爲已淵源尊慕
最在尤翁早登江門聞其真訣所服膺者直字相傳
一部朱書又其家計沉潛體認以樂簞瓢所造淺深
豈易窺測言議峻正操履剛方餘事文章亦由義理
大老家狀承命于師奉以質之溪蒙稱賞辨誣明覈
昭陽一疏訾詆朋興反求無歉學之不講惟吾所憂
杜門窮山采勤用力斯文何見天不假年士林嗟吁

百年如昨維茲鄉社昔祀四賢濠舟於公祖曾兩世
近復有議追舉未遑窮村鄭公暨趙近水嗟公世德
又豈可議涓吉同陞各從時序學行節義並耀齊光
薦以豆籩衿紳整肅庶我敢顧佑啓無疆

右晦谷位

附春秋享祝文

才合需世義高遯跡遺風在茲報祀無斁

右近水
位

篤行遠學後人之式薦此精禋永世靡忒

右窮村
位

希聖之學篤倫之行報祀于社永世起敬

右晦谷
位

延豐源泉祠告直齋李先生文

恭惟先生尤門高第氣剛質粹學邃德尊誰共淵源

丈巖文敬講磨道義晚益相推文敬家傳賢有醉石
孝友篤至問學精深斯文正論功著衛道絃歌餘化
又在於茲暇享之宜公議響合縟儀載舉日吉辰良
敬薦椒馨用伸虔告願共歆佑以永千春

源泉祠追享醉石鄭公文

資稟峻爽志操卓絕孝友根天尚屬一節以丈巖廬
遊寒水門父師所傳尤翕淵源粵自早歲濡染耳目
直字真訣乃其膺服研究經旨復勤用力獨得之妙
孰窺闔域見識超詣襟懷灑落曲言處事明白的確
斯文是非義理彌彰士趨不迷吾道增光百世聞風

尚知景慕矧乎茲邦儒化所布俎豆之舉合在於斯
邦禁有拘剗設非宜惟源泉祠直齋是尊直齋先生
丈翁同門於焉暇享士無異議涓吉妥侑齊芳並美
衿紳駿奔禮儀靡忒願我顧歆佑啓無極

尚州道川社春秋享祝文

行爲孝親禮嚴守身鄉黨百載誦慕如新報祀于社
籩豆恭陳

右黃七峯位

克守家範屢辨賢誣遺韻在茲士知所趨式薦牲酒
永世不渝

右甲晚隱位

志堅守正誠殫衛道風聲所及後生有造敬薦芬苾

維禮是考 右黃愚谷位

永同金氏世德祠追享金十清金鶴洲二公文
桑村家世忠孝是傳矧乎先生己卯之賢天資甚高
充養有素文厭藻繪學非章句惟趙文正聲氣質同
既見彙征方期治隆奉使歸路遽聞禍作蠱篆譖巧
士類其赤何罪一言凜乎霜雪及登前席訟冤泣血
而其開陳益驗所存姦黨增怒 聖朝特原謫還收
敘一謝而退士林百年誦慕不懈吾鄉有祠桑村是
祀配食三賢肖孫趾美追服先生士論齊發維鶴洲
公又可湮沒茲因春丁縉禮斯舉矜紳駿奔籩豆有

楚瞻聆欣聳世德彌光願垂歆顧惠我無疆

右十

忠孝之性堅介其操人能事親他可盡道觀於斯語
本立可知釋褐登朝思盡已分丙子虜警官實居卑
隨事周旋鮮不中窾歷敷臺省國耳忘身知無不言
言無不盡而其彈劾不避權勳虜嚇有因事機叵測
涵涵羣議亦爲公危公則笑談毅然其守方面之寄
庶展才猷忍言明時覆盆失照雷霆旣已雨露旋濡
顧其伸冤可徵百世桑村所祀將睨十清惟公同陞
士論允協矧乎茲土遺化所留昔配三賢又皆世德
瞻聆攸及疇不起欽趁此春丁緝儀載舉衿紳整肅

牲酒脂馨庶幾顧歆永垂啓佑

右鶴洲位

尚州東華社祀成東郭成華隱文

天王殉社九有腥羶遺民痛冤最我東土若二公比
蓋亦罕聞守皇朝身絕榮塗念壇有北望痛哭

諱辰苦節卅衷難兄難弟徽蹟上達褒美特加贈帖
紀年追改僞號士林欽誦愈久愈新祭社發論孰敢
疑貳歲又涓灘感慨采溪茲涓穀朝載舉縉禮衿紳
濟濟牲酒脂馨庶我顧歆永世無墜

附春秋享祝文

大明進士潔身長往報祀于社永世高仰

右東郭位

遜世清標蹈海高風式舉報祀垂耀無窮

右華隱位

安東侯德祠祀法川柳川二姜公文

太白之山擅勝南維昔姜潛隱避地于斯曰有同德
分華一區覺今沈公暨洪遜愚商山遺躅大明居士
有恤一宮後人報祀猗歟法川潛隱肖孫質淳氣古
學博行敦早闡大科溫飽非志末俗難諧歸臥田里
孝養偏親溫理舊書惟進與退綽綽有餘分安守身
念切向國章牘陳勉推其心得及至憂吉素履愈
貞操守可見天褒丁寧藩任之寄遽又引年高情
遐韻雖古罕肩柳川之賢卽其幼弟奚但怡怡載發

載啓雖業公車亦知有大性理羣書孜孜理會隨有
劄記不求其文晚更從師講質所聞寧學伯夷夫豈
空言平生恬約成規斯存名登薦剡一謝 恩命教
導後承是爲究竟是何清德萃于一家遠近欽誦鄉
黨之華爰謀追配士論歸一不忝祖武有光前哲茲
涓吉辰敬薦籩豆庶我顧歆永垂啓佑

埃德祠抱翁鄭公春秋享祝文

氣槩超世行義邁倫值倒冠屨誓不垢塵斂跡煙霞
潛心性理太白山水高風百禩

報恩屏山書院園隱靜菴兩先生暇享時並告

五先生文

天眷吾東文明將啓應運嶽降惟鄭先生以豪傑才
有聖賢學橫豎其說昭合紫陽一洗詞華爲理學祖
淵源有漸後學斯宗維時麗邦尚爾陋俗先生用變
居然小華而其事君一心忠赤竟以身殞萬古綱常
聖朝褒揚秦山高節斯文一脉以啓後人時際休明
儒賢輩曲猗歟文正間氣挺生早自得師操戈入室
剛正純粹灑落明通洛建之傳君民其志亦有羣彥
同時彙征將升大猷以淑世教北門慘禍天意難諶
砥柱忽傾邦國其瘁惟其遺烈百世彌章私淑愈多

報無憾瞻茲屏院先享三賢棠蔭遺墟芝蘭古谷
桑老所立與圃同歸自靖獻先不赴新召范滂遺教
願埋首陽允矣屏翁斥姦扶正不肯署案義凜秋霜
有文翼賢周旋紓禍矧又猿老李杜齊名纔警敗船
旋罹黨籍所守者義視死如歸先後五賢實維同德
一堂並膺允合事安神理無間士論齊發趁茲春享
爰舉緝儀矜紳駿奔遵豆有楚惟其位次年代是邇
圃桑在西靜屏斯造一體虔奉疇曰不妄文在乎茲
倫不失擬庶垂保佑於萬斯年

附
兩先生春秋享祝文

濂閩之學夷齊之節彌億萬歲其光烈烈

右園隱先生位

道全體用志切君民大胡薦瘞百世傷神

右靜菴先生位

報恩金華祠奉安曹南冥成大谷成東洲三賢

文

盛際

中明儒賢輩幽寒蠹先倡靜退繼興有卓文

貞崛起南服天稟絕特襟懷潔清屹立橫流名節自

勵惟敬與義聖訓是程如山畜天若雞伏卵奉盤屬

屬佩鈴惺惺嘯詠唐虞偃仰雲月清風起懦峻節激

類嶽峙斗高百世景仰猗歟大谷隱成有稱資稟溫

純志氣豪邁波乾松倒養德林泉通而不流介而不

其言有物而行有常美玉精金南冥所許高才大
器重峯攸訐臍馥猶存遺風未沫杖屨攸憩仰德采
藻允矣東洲天挺人傑卓犖高蹈灑落清風爲已之
工早自刻苦外若真率內實謹嚴清粹氣容灑脫襟
抱柳風梧月點瑟回琴薄試牛刀來尸茲土載聞儒
化丕變民風山高水長風韻如昨自社而院久已欽
崇曰維三賢並世同德眷言懷想命駕相隨于時三
山德星曾聚誰其賢主有溪堂公對床論經懸燈拈
韻共被之室醉臥之溪行路猶傳一方永慕瞻茲華
院先妥池溪緬懷名區四老合僎人情神理夫豈有

間士林一辭同堂齊駁爰趁春享謹舉綉儀髣髴當年聯襟序齒章甫全集牲酒脂馨庶幾顧歆啓佑無極

公州歧湖書社龐村黃公春秋享祝文

輔佑 聖朝培養士氣功垂永世式舉報祀

公州萬壽洞延平李忠定公春秋享祝文

英邁之姿早師大賢養之厚矣行得沛然靖社正倫功存永世誰其左右父子一體邱墓斯鄉景仰壹齊妥靈蠲饌祀典有稽以某某配食云云

木川崇明祠春秋享祝文

卓乎其節復師大賢恥浚帝秦歛跡林泉高風百載

欽仰采切茲值

春秋

丁報祀無缺

右金道源齋位

淵源端的見識精到爲聖人師功專輔導鄉黨永

世誦慕不已茲值

春秋

丁薦此報祀

右郭師傳位

金堤龜巖祠春秋享祝文

松翁規範沙老門牆行高識偉餘事文章化畱桐鄉

誦慕采切式舉報祀永世無缺

右鄭晦翁位

學識精明器局峻整佐命聖朝闢異扶正衿紳誦

慕愈久愈切茲值

春秋

丁報祀無缺

右黃四佳位

永同花巖書院追配兩賢春秋享祝文

簞瓢無愛頃篋有樂遺芬不沫報祀致恪

右朴二樂堂位

忠本於孝武官儒行式舉報祀永世起敬

右張五柳亭位

全州湖山影堂奉安兩先生文

世遠殷師俗陋麗季無往不復天理則然將啓文明
先生應運純粹之稟豪傑之才扶植頽綱倡明絕學
夷變而夏士謁朱程永世吾東受賜罔極瞻彼萬景
寔所登臨黃葉青山尚傳寶什惟臺之北清絕湖山
遊賞有誰我宋文正一舍相望草樹含香惟兩先生
前後一揆創祠崇奉仰鑽高堅顧茲一鄉舉切其願
誠殫力竭棟宇旣成茲涓穀朝摹影妥侑衿紳整肅

牲酒脂馨願垂顧歆佑啓無極

右圃隱先生位

恭惟先生命世大賢洛建正脉栗沙嫡傳以豪傑姿
有臨履工時際 寧陵契合昭融尊攘之任明正之
責 恩言鄭重不避困厄永世受賜孰不宗仰杖屨
攸及院祠相望惟茲湖山曾蒙遊覽崖畱心畫百世
興感萬景之臺圃老有詩蒼然入望今古齊徽建祠
殿享安莫斯先多士經營蓋亦有年堂宇既成遺像
已摹涓吉妥脩遠近奔趨牲酒既潔禮儀靡忒願垂
歆佑以永千億

右九菴先生位

附
春秋享祝文

淵源道學扶植綱常遺蹟所在景慕彌長茲值

秋著

丁禮祀是將

右國隱位

洛建統緒春秋義理杖屨攸及若蒙提耳茲值

秋素

丁恭陳明祀

右九菴位

光陽鳳陽祠朴訥齋

世煦復享文

英毅之姿嚶嚶其志以道源第遊靜菴門所造淺深

固可想得况於師席亟見稱譽早登王庭曾甚是

邑大闡儒化去思有碑後政尚賢建祠安侑誰其駁

享新齋崔公惟新齋公靜老所友此其桑梓已卯彙

征士林依歸有所矜式旋遭寇亂燹我宮牆復設之

初虔奉闕位非敢軒輊賀賀致然新齋英靈寧不悵
失衿紳嗟惜蓋亦有年今因重修公論峻發聽聞攸
及胥慶交欣同好鼎來舊儀載舉牲肥酒潔日吉辰
良並以事由敢此伸告願復歆顧啓佑無疆

附
春秋享祝文

資稟剛毅學有淵源遺化在茲終不可謾

告子婦申氏墓文

維 崇禎後四癸巳正月癸酉朔二十六日戊戌舅
告子子婦申氏之墓曰嗚乎汝之葬于此今將十年
矣余以疾病沉綿不得臨壙而僅一來哭汝有兩男

而未及長成百里之程無以使之來往四節香火惟
墓直是任心焉盡傷無時可已 國恩猥重兒又佩
符於青陽今茲奉祠版就衙不惟 德意是承亦爲
村癘之避而路幽墓下翼與甲也乃得哀省俯仰今
昔余懷如何最是翼甲其資稟皆足以及人而年遜
成童氣血尚未充完且其二妹亦甚清弱豈以早失
慈覆而然耶惟繼汝者甚有德性母子相得無間已
函汝若有知寧不慰悅茲薦醴果略伸告儀汝其饗
之

家廟焚黃告文

釋主寔賴餘慶猥叨正卿追典之加 恩誥乃降藐
茲孤露痛慕采藻追養靡從摧咽難勝敬薦清酌用
伸告儀

祭文

祭過齋金先生文

維 崇禎後三己未三月己未朔日門人宋釋圭謹
以菲薄之奠告訣于過齋金先生靈筵曰嗚呼痛哉
小子無狀獲罪於天早嬰風樹之痛又抱鴿原之悲
而惟先生依仰以爲命今又先生遽棄小子茫茫天
地小子曷歸嗚呼至情無辭至哀無文而小子之奉

訣於先生顧安忍終無一言然欲言乎其道德則非
蠡測所可究欲言乎其恩義則非拙筆所能陳小子
亦復何言哉惟先生氣宇方嚴而得侍者樂其和厚
言議直截而承教者悅其懇惻天之生德於先生若
將有意於斯世窮厄其身而大任不降剛確其稟而
遐齡反齎斯文終於無光士林爲之喪氣豈其迫於
氣數而理亦有不能專者耶遺文在稿而未斷修潤
之筆賢嗣蚤歿而門無知德之人其將證訂之敘述
之以俟後人於百世者且誰任其責也此尤小子之
所深悲而且懼者也若夫辛壬事實未遑編摩尤菴

道集未及劄釋而綱常日墜義理日晦則先生亦應
齋恨於冥冥之中矣嗚呼此豈可與不知者道也嗚
呼小子愚懵猥荷不遺獲蒙提撕於函丈數十年于
茲矣行之不力縱未有得自幸依歸之得所冀免
過於將來今焉已矣將復安仰靈辰不留祖道已啓
音容日遠典刑莫追單杯薦誠豈盡我哀一聲長號
肝蝕腸摧嗚呼痛哉嗚呼痛哉尚饗

祭再從叔性潭先生文

嗚呼先生純粹之姿專精之學進德之序造道之極
小子識淺何敢蠡測顧惟賢愚之共知亦有聞見之

可記曾子之確因魯而致顏淵之樂貧不爲累早負
賢師期詡之重終膺聖主尊禮之至承家傳之統
緒爲斯文之尸祝舉世翕然無有異說嗚呼徇欲之
恥乃完氣力康寧之享天佑有德夫何一疾沉綿累
朔珍劑天降良醫手束大耋全歸先生何憾九重
震悼師傅其歿士林相弔恹懔遽撤况在親黨孰不
摧割小子之悲尤不可抑小子昏愚實有難克猥謂
可教久蒙誘掖宮牆崇茂其門未得觀於處儀亦可
進益竊觀間居常自整飭應接之勞而無倦色奉先
誠恪老而深切憂時懇惻雖處若幽非不悅之懷未

能學今焉已矣復誰儀式嘗願承教終身佩服曰惟
謹拙吾家規則逝不墜失銘在心曲亦學後承相與
戒勗嗚呼靈辰不畱祖席已設攀慟莫及肝腸摧絕
略綴荒辭訴此悲臆不亾者存庶垂鑑格

祭李伯仁

守中

文

維 崇禎後三丙寅三月己酉朔二十五日癸酉卽
鏡湖處士李公終祥也友人恩津宋穉圭謹遣族弟
麟圭以其前四日己巳代酹于靈筵而告之曰嗚呼
惟靈雅潔之姿明敏之識早謝舉業潛心經籍至於
禮書尤致其力講習明熟考據精博吉凶常變應之

綽綽既豐於才數何局促陋巷簞瓢壽未半百豈天
不仁吾黨之見凡在親知孰不悼惜知己云云余懷
若獨余甚拙陋罕與追逐非不善交人嫌碌碌惟兄
不鄙相任惻惻鶴非雞羣蓬因麻直余竊虛名濫叨
臺職兄有愛言仍相戒勗甲子之春過余而宿挑燈
半夜共討幽積謂將楸下早晚卜築此計若成實近
我域庶幸源源益資麗澤別來未幾幽明遽隔萬事
亾羊慟微心曲轉眄之頃祥期奄迫貞疾在身竟未
趨哭是豈平日相愛之篤冥漠之中倘不我責茲綴
荒辭倩酌一酌英靈不昧庶鑑我臆嗚呼哀哉尚饗

祭庶三從弟麟主文

維 崇禎後三丁卯八月庚午朔十四日癸未宋君
瑞應歿旬日而將就窆窆前一日壬午三從兄剛齋
翁炙雞酌酒奠于柩前而哭之曰嗚呼痛哉爾何爲
而至於斯耶每謂哭我而悲者惟有爾矣豈意爾反
使我而哭之耶固知爾病之不可醫而乃不能相守
而面訣此亦關我命數之奇而爾豈不悵失於長逝
之時耶爾年纔過三十而上有老慈下有稚兒親黨
之相弔者不暇爲是而悲則爾家酷禍行路亦將掩
涕况余相視如同父者其何以爲患耶爾以溫良安

靜之資亦知讀書飭躬之爲可貴常歎事故多端不能專一下工今焉已矣古人天其遂願之說不可謂不我欺耶以余孤子賴爾相慰而爾遽棄我臨涼之懷難以自聊瞑目之前無非思爾之日今何必枚舉而爲辭耶至哀無文而亦不忍不告訣茲綴數行略訴悲臆爾其知耶不知耶嗚呼痛哉尚饗

祭金進士

正康文

嗚呼痛哉兄何爲而至於斯耶自我過翁之易簀尊門諸少之所依賴者惟兄一人而已兄何忍漠然相忘而至於斯耶死生有數難容人力則固非兄之相

忘而冥冥之中必有所齎恨者矣其然乎其不然乎
嗚呼計年則我少八歲較氣則兄實強剛竊謂我先
於兄而使兄哭我豈意今日兄反遽使我哭之耶嗚
呼兄以質慤之資克修敦睦之行處心忠厚作事縝
密宜其有壽考福履之享而坎珂蓬門飽經憂憾未
及中身畢命旅舍天乎天乎此何事也報施茫茫久
失其常則此亦不必爲之深悲而齷齪斯世將不得
復見斯人則余之所以哭之者雖欲不慟不可得矣
嗚呼我與兄論交殆近三十年而昔兄之寓於砂山
今我之居于田村相距又甚密邇步履相隨三日爲

疎有懷則共討有事則相謀相視如骨肉今焉已矣
余將疇依曩哭山頽兄實憐我之靡所依歸從今以
往踽踽之懷益難自聊而誰爲之相憐復如是也然
則哭兄而悲者實所以自悼也茲綴荒辭告訣祖席
兄靈不昧鑑我衷曲而盡我酒肴其如平日也耶

祭宋敬承

翼主

文

嗚呼兄其沒矣門內誰復倚仗之人用心之厚宐其
受福而反遭多釁稟氣之完宐其享年而僅踰中身
天惟難問我自傷神旣登仕路人信治民之有才而
未及出宰適寄家書自喜宿痼之勿藥而遽爾卽世

豈曰時令之爲崇實系門運之蹇滯嗟兄身後事有如麻顧不忍言言復盡耶龍姪慶弟無恙添齒令弟定嗣昔兄所擬前頭之望其在於斯九原有知庶慰悲思嗚呼惟弟於兄生後一歲兄弟之親朋友之契逢場情話間以諧謔兩心相照而無表襮余寓鰲村兄實周旋謂將追隨以娛晚年余固平生事與心違豈知此約亦徒增唏轉眄之頃終祥奄迫撫舊傷今懷緒千百略綴荒詞侑此一觥庶幾明靈鑑我微誠嗚呼哀哉

祭宋稽文

欽書

文

嗚呼門祚衰矣君安得享其壽耶門內有事必以關
聽而如其可爲不憚於勞心費力思盡宗子之責舉
宗依賴如枝附榦今焉已矣門祚衰矣昔我潭翁亟
稱於君曰孝爲百行之源而斯人之孝友實有人不
可及者雖其多獲世之訾謗宜觀其本領此固無間
之言豈所以私於君者耶然則屢興郡邑聲績著聞
特其餘事顧何足爲君道也惟其到處延接士流咸
得其心者非所謂大家規範者耶青旂之樹表追記
歸晚之移窆埋誌可見善述之一端而其將修舉先
事之未遑者固不止此誰謂未究其志而遽闕其年

耶嗚呼微青對吏戴星而歸哀遑之中疾病乘之纔
經一旬嗣子代服未及逾年賢季之平日所愛重者
又不勝喪酷禍之存行路堪涕矧在親黨傷痛之懷
尤當如何哉居諸迅邁終祥奄迫比年以來所可興
嗟者漸覺其多獨鬱悵無誰語而九原不可作則益
歎門祚之衰徒切後死之悲也嗚呼痛哉

祭金系祖

在忠

文

嗚呼君之筵几將撤而余懷之悲無以洩矣天既賦
君清明之質而君之秉心自不草率過庭之間宏振
家聲何爲夙嬰奇疾不能究其所學而竟至於夭折

也伯氏蚤世我先生血脉之傳惟在於君而君又無
嗣尤豈非神不可測而天不可必者耶臯復旅店固
有命焉而人事之未盡善不能無恨則顧余亦安得
辭其責也死而無知則已如其有知鶴髮高堂夜哭
莫慰以君平日之篤孝其必徊徨掩泣於冥漠嗚呼
天乎將使爲善者不用力矣嗚呼先生遺事尚無記
述遺文裒輯未就頭緒此實吾輩之罪而亦緣力量
之有所不逮知識之有所不足矣惟君在時猶且如
此況今無可任其證訂商確者耶靜念及此心膽欲
碎余雖欲少紓其悲得乎後死之責專靠述之而其

精詳之資可無墜失遽又遭癘而不起德門凶禍何其荐酷俯仰今昔益不禁衰淚之簌簌也嗚呼余之於君所以相視者豈異天倫而病軀拘於避癘之俗不能往會於終祥之日略綴荒辭替訴悲臆不昧者存庶垂恕諒而鑑格也耶嗚呼痛哉

祭族兄僉樞

得圭

文

嗚呼吾兄棄世矣善人可復得以見之耶日月雖久無已其悲俛仰之頃奄近再朞弟之來哭尚此稽遲雖緣賤疾一直支離揆以情理是豈所宜以兄仁恕倘垂俯諒於冥漠之中顧弟含痛莫洩踴躍靡騁之

懷有不可涯也嗚呼吾兄安靜慈良弟之所心服而
自子兄兒益知其所未知晚暮相依庶樂墳簞及夫
成也之意外佩符擬共就養少慰我平生孤子之思
竟莫之遂而幽明遽隔痛矣痛矣亦豈非弟命數之
奇者耶嗚呼稀年加六非不壽矣推恩緋玉非不榮
矣既壽且榮而聞兄之喪者莫不驚於心而失於聲
歎惜其未獲養於專城吾兄仁善之實孚於人者可
謂深矣彼族黨之親熟者而作變於邱墓何獨非常
情也嗚呼至情無辭至哀無文而弟之薦此一觴亦
安得無言病裏數行顧無以道盡則據此臂臆惟俟

歸拜於九原而已嗚呼痛哉

祭宋聖襄

欽夔

文

維崇禎四乙未四月四日近故文學宋君終祥也
值國哀退行祥事於五月丁卯族叔鰲村病叟沉
淹床席無以往會乃遣孫男後洙以其前二日乙丑
替酌于靈筵而告之曰嗚呼君何爲纔及中身而遽
沒也君之稟氣似非數促者先兄長厚德宐其壽後
而神理之舛乃如是豈非所謂不可推測者耶君忍
飢勤苦終得大闡於古家寂寞之餘族黨之所喜幸
所鄰之所期待果何如而蹭蹬十餘載僅得六品而

止豈以時世之不古抑亦門祚之衰薄凡在朋儕莫
不爲之嗟惜君能任運自守不沫前徽則可以無愧
於歸拜先靈惟一麾榮養未遂至願此爲君之所齋
悵而後死者之所深悲也然推恩緝玉設筵奉歡顧
非凡爲父子者所願欲而不易得者耶且君之二子
皆有克家之望而大哥其志尚尤可嘉也不食之報
其不在於斯耶然則君之身後雖謂之無憾亦可矣
君之筵八將撤而一舍之地余以疾病竟不得往哭
情理可謂掃地冥漠有知庶或我恕而此心悲缺何
可涯也嗚呼先兄長狀文不忍以不文辭而病夫惜

神久未滋筆屢被大哥之見督僅已構草而分外難
開不能粗滿已意愧悚之外甚恨不得奉質於君在
世之日矣然若更延時月而得少安則敢不益加修
潤氣息奄奄言不盡意只有老淚沾臆而已君其鑑
我誠而盡我觴也耶嗚呼痛哉尚饗

祭琴汝聖

品評孝

文

維 崇禎四乙未五月己未朔十日戊辰卽奉化琴
君汝聖之終祥也前三日乙丑恩津宋穉圭謹以十
挺致其靈筵倩人代酌文以告之曰嗚呼余與水鏡
後人世好既篤而惟君父子情誼尤摯我有一飯之

先而且自貞疾每謂哭我而悲者宜莫如君豈知今日我反哭君耶顧我謏寡實無可取君之長胤逐臭多年而其襟懷之雅潔操履之精詳見推於士友氣清數局遽闕其年余之悼惜久愈不能已况爲其父者耶况荐哭此毒憾於數年之間者耶每於逢場力言寬抑以慰逝者孝心而君輒哽咽不能答此非君之所以受傷而促齡者耶君淳厚仁善之資敦宗保族之義宜獲神佑而報施之外何其如是君家父子之喪余俱未得臨筵一慟今茲數行亦不能盡情撫念平素有淚沾臆而已靈其鑑我衷而歆我觴也耶

嗚呼哀哉尚饗

祭金景心

東淵

文

嗚呼君胡爲先我而逝也病健老少理之反常乃如是耶余之庸陋人無有相好者而惟君見愛思欲早晚卜鄰朝暮相隨今焉已矣實關余命數之奇也余始與君相見甚愛其淳雅之姿不失古家儀範後又與相處深知其子諒之心實非叔世人物仁善之報宐其所獲年止於免夭而主喪者戴星此非所謂難諶而難測者耶且君自謂早事舉業讀書不能體認將溫繹四書根究其旨以收桑榆之功而亦爲敦養

附錄
卷之十

三十一

子若孫之地未免齋志而沒悲夫悲夫古人所謂遂
吾願者果何謂也星霜再周筵八將撤而顧此奄奄
殘骸末由蠢動乃不得臨筵一慟撫舊悲缺不可涯
矣而冥冥之中君亦應有所悵失也嗚呼其然乎其
不然乎病裏荒辭無以盡臆惟有無從之淚沾襟而
已嗚呼哀哉

祭金內之文

在精

完而厚者非君之氣質耶和而靜者非君之情性耶
以若稟賦誰謂未及中身而遽閔其命耶務盡歡君
之所以處宗黨也推實心君之所以交朋友也有是

善良固安哭而悲者不能已於久也嗚呼兩世三老
養之不終也應泉臺含痛無窮又况纔就窀穸而阿
叔繼逝未撤筵几而萱闈卽世酷禍之荐神理堪疑
承家克肖乃有佳兒天之報施其不在於斯耶嗚呼
昔侍過翁稱君淳朴齷齪斯世君豈易得惟余與君
視同骨肉事必相謀或不避瑣屑過則相規却不嫌
煩數哭君以來偃偃靡適余懷之悲曷有其極略綴
荒詞侑此一觴賤疾適苦亦未暇將俯仰愴缺有淚
盈眶嗚呼哀哉

祭庶從叔

煥履

文

嗚呼吾叔稟賦實有過人不幸早孤家事剝落才豈
人下未獲勅書惟其處心行已接物鮮不暗合見稱
法門吾必謂之其非古訓稀年加八子姓振振福善
之天固可驗矣猶有所憾戴星者多情境之慘奚但
生者聽聞飲及莫不嗟傷矧在同堂曷勝披涕嗚呼
吾叔沒矣愛我者誰我移鰲村爲近吾叔昕夕來往
三日爲疎凡有喜憂靡不與共疊疊情話間以談諧
時或忘言終日相對曰叔曰姪人孰無之相照心肝
幾乎若獨竊意此樂可送餘年世故多端叔忽移宅
三亭草洞會面闊稀暨入僊遊徒勞魂夢我於吾叔

生後一年貞疾在身隨衰轉劇每謂吾叔哭我而悲
豈知如今反使我哭此實關我命數之奇日月丸跳
祥期奄迫臨筵一慟竟莫遂心我懷如何固無論已
叔亦悵失于冥漠中泉下相逢苟有其理握敘之日
知亦不遐茲綴數行替酹一酌靈若不昧庶鍾我衷
嗚呼痛哉

祭亡弟學圭文

維 崇禎後三甲寅二月己未朔二十日戊寅卽亡
弟子紹入地之期也前一日丁丑舍兄因朝奠哭告
于靈筵曰嗚呼痛哉自爾之逝月易而歲改春序已

仲尚未得一夢相接豈爾漠然而不復念我耶吾獨
生存能食能寢時又能與人言笑抑吾頑然而已能
忘爾耶臨沒閒暇不少自憾母爲過哀再三戒我則
爾固不是忘我者而又有使我不能忘爾者余之粗
幸爾之所箴而耳久不得聞爾言爾之沉靜余之所
悅而目久不得見爾容則今我哭弟兼失益友矣余
雖欲忘之其可得乎嗚呼自爾還寓砂山源源之樂
可慰孤露之懷而隔溪數里猶嫌其稍間且懼固陋
而無聞方謀移宅貞山對門而居從師請益以畢餘
生誰謂此事未成而爾遽棄我使我抱此無涯之痛

也且余年近四十尚無一子爾雖爲余愛之惟爾年
富而再娶未久方切多男之祝余則恃而無嗣續之
慮矣居然今日反使余憂爾後事而吾父母血脉之
傳凜然而危矣嗚呼天乎此何事也爾之處心仁厚
持身謹拙宏受其福而歷數平生無一可言報施之
理誠茫昧而其將使爲善者息也嗚呼死而有知則
爾得歸拜吾父母于地下而服事于左右以有怡愉
之樂矣豈不憐余孑然在世無與相依而余悼爾
之死爲不可也耶但爾出後偏親在堂白首夜哭無
辭可慰則是又爾徊徨掩泣於冥漠之中者也嗚呼

附錄
卷之七

三十八

其然乎其不然乎嗚呼卓村諸阡爾常欲擇地移奉而爾內之葬尤非其吉則又營爾葬于彼誠有所不可卜地于砂山不幸遇水患猝更扞穴于吾家後以爲十年之計而距寬洞先塋不遠且是數十年盤桓之地則爾其或安之否耶嗚呼痛哉嗚呼痛哉尚饗

祭亾室金氏文

維 崇禎後四癸未二月辛丑朔三日癸卯恩津宋釋圭酌酒而告于亾室金氏之靈曰嗚呼君之沒歲已周而筵將撤矣余可無一言以道懷耶嗚呼生死理之常而七十古來稀六十五歲不可謂不足於享

壽矣脩短數之局而偕老人所願四十九年不可謂
不久於同室矣況此二者吾家四五世之所未有則
余之哭君夫何憾焉顧余拙於謀生家事晚益剝落
君之終身勞苦有不可言而君能任分不以怨咨篤
守我先妣遺規祭祀賓客使余忘其憂遽嬰一疾先
我而逝余之所怛然而不能忘者豈其過於情耶且
余之主喪兩世各葬而先妣宅兆尤非其吉緬奉合
窆積有經營君嘗謂余何不早圖而趁我之未死耶
我雖無能久主內事凡百相議庶或有助此實憂余
之至意惟余不孝尚不能擇吉地而存今已矣余亦

前冬以來疾病增劇精力都銷將不免齋恨而死每
念君言只切痛心泉下有知君應悲余而不已也病
莫數陳言止於斯君其聽之乎否耶嗚呼痛哉尚饗

祭子婦申氏文

維 崇禎四丙戌三月壬午朔二十日辛丑舅以薄
具酌于子婦申氏之靈筵而哭之曰嗚呼痛哉余之
命塗嶮巇多哭逆理而豈料將死之年乃又哭汝耶
汝以清弱且苦善病遐齡固非所期而其不免於夭
折豈非余之數殃有以致之也嗚呼舅媳之屬人誰
無之惟余於汝情地自別余實負螟汝爲兒婦而汝

是吾母從兄之孫則吾母無血屬而有血屬矣然則
雖使汝有不逮人者余心之慰幸猶不能已矧汝生
長孝友之門能不失其規範者耶汝連得二丈夫子
於多年懸望之餘而精明之姿皆甚可愛其爲欣慶
尤當如何汝養於內吾教於外庶見其成就而每恨
余餘日之無多奈何汝反棄諸幼而遽先我使余抱
無涯之痛也此實余獲罪於神明厚受其罰也痛矣
痛矣汝之入地余不能臨殯汝有乳女往依汝慈童
凡此種種情境人理之所難堪行路之所掩涕而余
之所摧傷而不已者夫豈爲是而已也日月丸跳汝

之靈筵將撤略綴荒辭道此悲臆汝其聽之否予嗚呼痛哉尚饗

祭弟婦李氏文

維 崇禎四丙申十二月庚戌朔十四日癸亥卽弟婦孺人李氏終祥也夫兄釋圭病委床席使予欽成以其前四日己未因臘薦文以告之曰嗚呼吾弟出後偏慈在堂性孝心仁不獲神佑癸丑之痛尚何忍提時則惟靈行纔周歲情境之酷若無於人然能持家養姑主祀憂勤勞苦閱幾星霜晚育螟兒在類不後娶婦生子家道稍成截少分甘庶娛暮境平生奇

疾又失遐齡天乎神乎萬事已矣俯仰今昔摧傷曷
任泉下相逢倘若人世歸見夫子可以有辭嗚呼我
生不夭早孤終鮮凡三同已居長者余外內無論已
獨陽界韓子有曰悲不幾時未泯之前此懷何似爲
訴悲臆茲綴數行靈其聽乎我自掩涕嗚呼哀哉尚
饗

銘

海州石潭聽溪堂石井銘

石發天成源濺而潔久供顏瓢味甘而冽盈科而進
晝夜不息苟欲升堂宜爾取則

石潭念修齋銘

栗谷先生主壘孫郡守李侯修葺先生舊堂增廣一室以爲教課後人之所而未及名之侯之仲男點推其先意扁以念修來求銘於恩津宋穉圭穉圭以托名於堂爲榮不以不文辭銘曰

栗老石潭晦翁武夷舊堂歸然著存存斯主壘李侯因其重葺增燕居室以資講習念修之扁賢胤所揭蓋推先意而詔來裔入此室者可以知警身非私有克治宏猛詩禮之學寧或少緩內行務篤外誘是斷然後無愧大賢之門全書在架余不多言

性菴銘

爲金斗一作

人性本善聖凡不殊養與失養遂分賢愚百千其功
宐竭吾才人皆堯舜豈欺我哉

讀書銘

爲韓公翰作

韓君季鷹將專讀庸學求我勉戒數字余惟二書
各有讀法而大學尤爲詳備復何以贅勞讀法旣
備工夫之進與不進惟在勤慢之如何而先難後
獲聖訓炳然不可專靠師友又是前言茲以竭力
二字相告亦用自警顧老病將死終已而已則豈
非韓君之所當鑑戒者耶韓君其勉之哉

不有憤排孰能啓發爲之在我惟力是竭

苟夫巢櫓銘

鄭寢郎耄賊斫不死既免喪除職不就杜門讀書
將以沒身名其室曰苟夫巢櫓屬余寫之余固不
解點畫之法而悲其志高其節不以辭勇而復題
數句語於下方以歸之

臨難誓死陪父從兄志著並節痛入獨生 恩命自

天榮塗匪心杜門斂跡感戴徒深惟其家學是爲究
竟觀此扁櫓人宜知敬

剛齋先生集卷之七

剛齋先生集卷之八目錄

碑

紹賢書院廟庭碑

學堂金公遺墟碑

松崖朴公遺墟碑

彰忠祠事蹟碑

鳳陽祠事蹟碑

月塘崔公遺墟碑

龜淵書院事蹟碑

逸翁崔公神道碑銘

愛勤堂趙公守墓遺墟碑

墓碣

昌平縣令李公墓碣銘

湖城君李公墓碣銘

崔烈士墓碣銘

成均生員林公墓碣銘

孤山全公墓碣銘

副總管 贈兵曹判書申公墓碣銘

學生閔君墓碣銘

墓誌

養新齋申公墓誌銘

成均生員孟公墓誌銘

學生琴君墓誌

澹窩申公墓誌銘

國朝
通志
卷之
八

三

剛齋先生集卷之八

碑

紹賢書院廟庭碑

海州之高山九曲寔我文成公栗谷李先生邁軸之地而世稱爲東方武夷者也始先生定居于第五曲石潭取武夷大隱屏之號築隱屏精舍退休之暇與門弟子藏修講討於斯用寓宗仰考亭之意焉先生嘗以爲濂洛以來博約兩至集羣賢而大成莫如朱子其在我東則倡明道學而自任以堯舜君民無如靜菴趙文正沉潛義理而謹守乎朱門成法無如退

溪李文純擬立朱子祠於精舍之北而配以兩先生
先作學規以訓生徒適承 召還朝祠未及成而先
生歿後二年 萬曆丙戌門人朴公汝龍等遵遺志
乃建祠安靈至丙申追配先生是為石潭書院庚戌
賜額曰紹賢 顯廟辛丑又追配牛溪成文簡先生
肅廟丁酉暨 正廟丙申又追配沙溪金文元尤菴
宋文正兩先生趙文正李文成金文元位東序李文
純成文簡宋文正位西序嗚呼休哉朱子之道炳如
日星天下之所共師也然其信之篤而慕之深惟我
東人為最此非諸老先生之教耶諸先生道德固非

後學所敢窺測而靜退所造文成定論無間然矣文
成公繼靜退而興常自信曰幸生朱子後學問庶幾
不差而竟得其全體大用之傳文簡公乃文成道義
之交而相與仰鑽瞻忽不失正脈文元公實文成之
嫡傳而又有功於朱子朱絕筆之通解觀於宋文正
所撰本院告朱子文可知矣至於宋文正公又是文
元之嫡傳而曲處語默一遵乎朱子且於背馳朱子
者闢之廓如故我 正廟爲製兩賢傳心錄以明其
道之相合然則我東院祠指固多屈而淵源統緒之
端的相承未有盛於斯院者矣是以 聖朝所以表

章之者迴曲尋常往往 英廟庚辰命畫進書院基
址 正廟辛丑又畫進高山九曲癸卯板揭崇儒重
道 綸音庚戌又揭 御製擊蒙要訣序文甲寅印
頒四書三經如白鹿洞九經故事道臣與院儒建閣
而尊奉之榜曰榮賜龕蓋他院之所未有也院之創
今二百餘年尚闕牲繫院之多士將治石而立之文
成公後孫點來屬余以記蹟以余爲宋文正之裔也
不敢以固陋無文辭遂謹書院享事實及 朝家崇
報之顛末俾刻焉且以告于多士曰祠院之所由設
者教也聖賢之所相傳者心也凡入斯院者先從事

於學規以立根基進而求諸諸先生相傳之心法而竭其才焉則庶不負文成先生尊賢牖後之至意而有以對揚乎 國家右文敦化之宏撫矣盍相與勉之哉

學堂金公遺墟碑

全義縣東雲 山下學堂洞者高麗檢校金公屏居而自靖之地也公名休字鍊夫安東人公以京華世族登第仕于朝圃隱鄭先生死與崔晚六溪幽國門痛哭相別各退隱于鄉蓋二公同受學於先生之門公既絕當世之念惟以養親講學爲務我 朝受命

太宗屢徵以官終不曲沒而葬于是世傳洞之名肇
自公時而因公實蹟云嗚呼文獻無徵公之始終固
不能得其詳而考諸譜牒及邑誌所載有以見大節
之偉然者則餘可略也抑公師事大賢嘗以卓節至
行見許而畢竟所成就如此其所講之學之正從可
知也惜乎其泯泯無傳然公之後承多以忠孝蒙旌
褒之典若外裔則平陽朴先生彭年精忠貫日打愚
李文穆公翔陶菴李文正公粹道學名世夫孰曰靈
芝無根醴泉無源也哉公之諸後孫將立石以表其
遺墟來請余識其陰者曰奎漢仁基也余以陋拙辭

不獲略書此俾歸刻焉

松崖朴公遺墟碑

石潭九曲之第四曰松崖朴公諱汝龍從學于李文成先生築室於斯仍以自號焉公字舜卿沔川人工曹典書諱謹其五代祖也幽按海西遂奠居于海州公早失怙恃零丁無依能自奮力學不以飢寒而廢業及依歸師門得聞爲己之說則益勵其志於性理諸書講究不懈先生之所期許同門之所推重在海西無幽於公之右年三十三中萬曆癸酉司馬兩試四十一先生秉銓舉卓行除厚陵叅奉六十一

以工曹正郎謝官歸老于松崖七十一而考終其監
青陽縣爲政清簡未周年忤上官意罷歸民有去後
思壬辰之亂公以前奉事倡義旅扈 駕于龍濟錄
勲追榮父母後公亦 贈左承旨公侍先生日記其

所疑問及先生訓辭名曰語錄惜乎逸其半猶可以
見公爲學之大槩而亦多有開發於後人者先生沒
牛溪先生屬沙溪金文元公編摩遺集公實同其役
而校讎剞劂終始盡心先生嘗欲祠朱子于五曲隱
屏下配以靜菴退溪兩賢適赴 召在京托公以經
紀其事未及成而山頽公竭其誠力卒如先生之志

而後又追配先生且草疏率諸生請額而蒙 允今
之紹賢書院是也嗚呼公少而劬書立心超凡壯而
志道遂師大賢而莅官而愛民遭難而勤 王又不
負先生之所薦用此其資質之過於人踐履之得於
學而講習研究之工至老彌篤則牛溪致書溪歎好
學之志日新不已我先祖尤菴文正公亦嘗稱其造
詣得正而惓惓訪問其後承有無若遂菴艮菴諸賢
皆以俎豆之遲爲欠事猗歟盛哉欲知公者觀於斯
庶可得矣今公遺墟士林已建祠享之而諸後孫復
欲立石以表之屬余識其陰謹書之如此

彰忠祠事蹟碑

嗚呼上帝降衷不以賢愚貴賤而有所豐吝則忠義之發於性者安無彼此之別然粹當板蕩之際死生判於前利害交於中則雖士大夫之自謂讀書知義理者鮮不惟惻罔措失身負國而有以刀筆小吏乃能辨逆順於向背竭誠力於捍禦民彝不墜國家有賴則豈不卓卓然可尚也哉粵在英宗戊申逆變起於嶺南希亮熊輔等稱兵於安義凶鋒先及於居昌時昇平日久民不知兵粹見賊勢鵬張豕突一邑鼎沸鳥竄獸伏而爲邑宰者亦將躲避邑吏慎錫

顯克終德顯致勤光世等痛哭入縣庭雪涕陳君臣
大義竟不聽功曹見執而死之事機甚急若緩時日
則賊必遂嶺躡湖錫顯克終等遂同心合力團束邑
中爲義隊或有畏縮者慷慨諭之曰蜂蟻亦知君臣
可以人而不若乃血書揭旗痛哭誓死復以厚賞募
急足密通三營請其疾速進兵而或奪還稅木於邑
藏或贊畫方略於假守且密遣腹心於賊中曉諭被
擄軍校呂海達等使之回心向國隨機潛圖竟殲
賊酋於境內此雖王靈攸暨而亦豈非五人者忘
身效誠之致也耶觀其蒼黃中裂衣收屍於功曹立

殓始終看護則其不畏死而盡分於所當爲又可見矣亂定查功錫顯錄券克終等四人讓而不居後因道啓繡褒次第登聞 正宗十二年卽戊申周甲也宸衷特感因大臣陳白 贈克終水部員外郎仍命道臣採接其家蒙褒賞而見漏者以聞追舉闕典錫顯等四人依克終例俱 贈郎署先是戊戌鄉人建祠于縣司之傍扁以彰忠至是因政府獻議達于天聽因春曹行關官給享需 純宗辛未移建于邑之東五里開封里龍涵山下而儒林主管焉所以崇報之者可謂無憾矣噫戊申逆黨係是搢紳世族而

醞釀煽亂非一朝一夕嶺之人不被其訛誤者幾希
而 贈都憲李公述原 贈承旨愼公溟翊俱以功
曹先後取義此五人者奮乎胥徒其所樹立又表表
如是而若曹校漢伯之牢守軍器矢死不曲亦甚奇
矣斯可見帝畀之衷不間乎貴賤而亦豈非嶺以南
磅礴清淑之氣鍾此一等人物以弭一時禍亂者耶
彼爲命吏而或棄城逃竄或觀望不前者抑獨何心
哉嗚呼一縣之小而忠義若是可謂夥然而愼門之
至得六人又罕其倫宜其蒙 褒獎而享俎豆也邑
之人士將樹碑於祠庭以記其事而克終之曾孫致

能以齋儒意來謁余竊念晦菴夫子每眷眷於節義
至於山僧衛士之賤亦必收錄而表章之今於五忠
之役余何以老病無文終辭而任其埋沒耶遂強起
書此俾歸刻焉

鳳陽祠事蹟碑

書院者士子藏修遊息之所而建祠以祀前賢所以
瞻依而矜式也湖南之光陽濱海小縣舊無書院
萬曆年間知縣鄭侯淑男祀鄉賢新齋先生崔公諱
山斗前政訥齋先生朴公諱世煦于縣學之傍於是
縣之業於儒者有所依歸旋值倭亂見燬於丁酉蓋

二公皆己卯人新齋公靜菴趙文正先生所友而詡
齋公樞衣於文正之門者也噫新齋公之生長是邑
橐征于己卯而與趙文正同其始終其爲是邑之光
華顧何如若詡齋公佩符於是邑盡心學政大闡儒
化豈非所謂君子學道者耶特祀二公以興起士林
可謂知先務於政化之要矣惜乎無以詳鄭侯之本
末也亂後幾年邑之章甫狀于營邑而復設獨享新
齋而詡齋不與焉事在久遠固未知其何故如是而
一體尊奉之地舉錯頓異宜爲有識之所嗟惜而新
齋英靈亦豈不悵失於薦享之際也今 上戊予以

祠宇頽圯改而新之士論峻發欲於還安日復脩
齋遠近響合莫不欣聳嗚呼觀於人事而神理亦可
推矣主其論者鄭君漢基任其事者徐君顯斗徐君
以其王父潤和嘗致誠力於院事不憚勤勞以趾其
美云訃齋族裔朴君禎一久從我遊以多士意來求
脩享文且曰將記顛末刻石以示後願賜一言以重
之余以不文辭不獲遂略識之如此

月塘崔公遺墟碑

全州府南門外溪山擅勝鉢山之陽玉流洞有月塘
崔公遺墟今去公之世已累百年矣而巖臺諸刻尚

宛然人之過之者猶指點而咨嗟夫豈一時繁華之
盛有以致然哉公全州人名霑煙村先生德之之考
也煙村公手錄公實蹟求文字於人有曰吾先君生
於至正丙戌五月四日甫九歲而孤性好學舉業中
司馬諡於壬寅仕內侍拜叅官又中丁巳文科不勝
將母之念退于桑鄉子職極修而仍喜遯自樂不求
宦達丙子爲賢相所薦以奉常少卿應命戊寅拜
中訓知珍州事庚辰解組還鄉日以花木詩句爲事
而優遊自適丙申蒙優老恩陞檢校戶曹叅議集
賢殿提學又曰接人謙恭康強無比八旬以後騎馬

無人扶持徒步無杖提携而遍行鄉閭遇孫姪輩亦
下馬受禮而鄉中慶弔迎餞無不與焉嘗餞府伯于
月塘樓上呼兩妓執紙立書一絕有願入岐陽朝罷
後湖南須記一閒人之句甲寅六月得疾言語動止
無異平日似不極苦以其二十五日倏然而逝此其
始終大略而所謂丁巳 皇明洪武十年而丙子我
朝受命之五年也嗚呼公既有厚德復享清福當時
名勝多作詩讚頌之者其爲後人之所誦說不衰固
宜矣且巖臺諸刻若光風霽月鳶飛魚躍公之襟懷
意趣有足以想像者而所與遊是金節齋權陽村崔

晚六齋公則又豈非不見其山願見其木者耶公有
四男長匡之次直之皆集賢直提學次得之典農少
尹季卽煙村以淳德高節爲世文兩朝名臣官藝
文直提學孫曾以下以文武官顯者甚多而從事儒
門行義著稱者又非一二則讀詩序所謂積善餘慶
之正理者信不誣矣遺墟久爲他人所有公諸後孫
合力還取之而將立石以識之來求余文者曰觀錫
謙錫也余感其爲先之誠意不以蕪拙辭而略書之
如此云

龜淵書院事蹟碑

安義山水鄉也蓋多名碩幽於其間豈磅礴明淑之所鍾氣耶縣北四十里之猿鶴洞有搜勝臺臺之傍有龜淵書院院之所建祠安佑而瞻依矜式者鄉之三賢樂水先生慎公諱權字彥中石谷先生成公諱彭年字頤翁曰黃臯先生諱守彝字君敘而樂水五世孫也三賢者皆以拔萃之資篤於孝友絕今學古而人爵在人天爵在我安可捨我而求諸人者樂水之雅言也早捷司馬兩試聲名大振而晚乃收蹤反服專以養親觀書爲事者石谷之高標也克繩先武益嚴自治而晚更從師講究不懈者黃臯之實蹟也

嗚呼歿而祭於社者鄉先生而其卓行遠學可以範俗而垂世不但爲一鄉之善士則崇奉之舉尤有所不可已者此非三賢所以享于是者耶三賢所造固非淺陋所可窺測陶菴李文正公粹銘樂水而言其明體達用桐溪鄭文簡公蘊傳石谷而稱爲間氣人則其規模氣像之大槩有足以想得者而樂水之竭力事親而常自不足石谷之倡義痛哭而感泣一軍乃忠孝可見之實也若黃臯先生其從事於小學而以慎獨二字爲終身之符者一循乎樂水奎轍而嘗糞硯指啜粥廬墓又豈非古孝子之至行耶其始就

陶菴之門陶菴讓其師事待以友道而和其詩曰朋
來千里歡如舊同善何論覺後先斯又可以驗其所
存矣猗歟休哉凡遊息於斯者先須濠體乎樂水之
雅言而知內外輕重之分然後可以得石谷之高標
而追黃臯之實蹟盡相與勉之樂水之所與友林葛
川薰兄弟而遊於石谷而自言其得力者乃桐溪也
蓋其居密邇而溪得乎講討之樂矣寸室之邑其盛
如斯而繼而興者復有黃臯之賢信乎人傑之爲地
靈矣書院之創在於 肅廟甲戌而今 上戊辰追
享黃臯云

逸翁崔公神道碑銘

我國兵燹之慘莫酷於壬丁島夷之變而時則有李
忠武公舜臣統三道舟師戍中興偉績其麾下士固
多傑然可稱者而賊退之後不居其功歸老江湖以
晦其跡者逸翁崔公是已公諱希亮字景明自號逸
翁又稱臥龍崔氏系曲水原隋城伯永奎其鼻祖也
世襲簪纓高祖淳敬差官曾祖貴澹僉使祖瀛 英
陵叅奉考樂竊葆員守拙以厚德見稱濟用監正
贈左承旨妣光山金氏部將攀女以 嘉靖二十九
年庚申生姿貌魁傑志氣卓遠少好讀書略通大義

以親命業武庚寅五月丁承旨公憂執喪以禮壬辰
倭變守制在廬甲午登武科是年冬佐婦翁忠清水
使李公繼鄭幕同李公率舟師赴防閑山島中流失
火同舟盡燒溺公脰兩革鼓投海浮涸累日幸遇他
船得活翌年薦拜宣傳官及丁酉倭寇再徂 宣祖

命揭倭酋秀吉像使諸武臣射之公正中其額 上

大喜特除興陽縣監時朝廷命沿海守令盡屬舟師
公卽赴李忠武公統制幕下忠武知公勇略倚以爲
重每戰輒贊勇先登以八隻舟師當蔽海之賊一捷
于鳴島再捷于尖山三捷于曳橋又設奇夜斫賊陣

賊驚駭退遁取其租六百餘石以館穀時忠武以讓
去公在縣倡率瘡殘造戰艦繕戎器躬曳木同甘苦
翌年戊戌忠武復領舟師特爲褒啓自春徂秋連獲
捷勝於楊江姑島及縣南門南堂浦前後斬獲甚衆
又誘還我人被虜者七百餘名其上功文帖至今尚
在時兵使與統制不協疾公之專聽忠武節制誣啓
請罷 上不許兩司至六啓始許遞因 傳曰目今
朝夕危急交遞之際必生大事此可以見 上之知
公矣未幾新倖高德蔣果敗沒於賊公旣解符畱統
制幕下贊畫戎機十一月忠武大會舟師鏖戰露梁

焚賊船數百艘追至南海賊大挫衄逃遁而忠武中
尤而卒公既被誣罷官又喪元帥無復當世意遂痛
哭歸鄉杜門屏跡爲終老計有詩曰亂中人事變歸
臥欲藏名依然舊時物磯上白鷗迎癸卯丁母夫人
憂持制一如前喪乙巳朝家論功錄公宣武原從一
等公素執謙退恥自矜伐而旋值昏朝自甘棄置公
議愈鬱州人進士吳挺男等二百餘人上疏訟屈不
報公構小亭於錦江上漁釣爲徒詩酒自娛若與世
相忘而愛君憂國之意輒形於吟詠所從遊唱酬皆
一時名勝而林白湖梯林閑好堦白松湖振南尤其

著者也 仁廟內子虜兵猝至南漢被圍公年七十
七矣露立北向日夜號哭謂諸子曰南漢若破吾亦
當自盡送第三子監察結扈從及聞讙成不勝悲憤
自爲文敘其老耄勤王憂國眷眷之意而末乃責當
路者之爲春秋罪人方九十歲讀中庸作文自警曰
朝聞道夕死可矣當惟日孜孜斃而後已以大耄進
嘉善考終于辛卯十二月二十九日享年九十二葬
于大朴山下抱西之原配原州李氏水使繼鄭女繼
配濟州梁氏主簿達洙女九男二女男長緒軍資監
叅奉次緞次卽監察次糾次繪次綬次蘊次綬次絢

女長適閔承胤次適文載尚李氏墓在侍郎面木洞
先兆上梁氏與公合祔公沒後百二十四年 英宗
甲午因大臣筵白贈資憲大夫兵曹判書 正宗庚
申鄉人建祠享忠武公而以公配侑嗚呼公稟忠義
之性而兼千城之材早年投筆時際搶攘 聖主奇
其才主將倚其勇露梁閑山隨處立功廓清湖海之
氛以基中興之蹟遂策勲一等吁其壯哉暨元帥旣
亾媒孽傍伺見幾超然歛跡湖海終身落拓而不見
幾微不亦賢乎丙丁之歲公已遲暮而遣子勤王誓
以自靖逮天地翻覆之後慨歎莫伸春秋之義忠憤

激昂累形詞章若九十之年猶讀書自警夫豈可以
韎韐者流視之也哉惜乎功而不賞忠而見忌卒坎
壅以沒也然而天道孔昭既享大耋多男之福公議
亦大定於百年 朝家馳之以正卿士林侑之於鄉
祠公於是可以無憾矣公之後孫齊東白首重繭來
乞樹墓之文以不文辭不獲茲就其狀略敘而銘之
銘曰忠義之性文武之才慨然投筆遭時艱虞射中
賊像特荷 聖眷南氛再漲分符海縣惟時忠武統
率舟師公奮忠勇最被其知螯弧登先龜艦著前血
漲南海氛廓閑山中興偉績公實先後遭間解綬又

聖元帥蕭然江海歛跡藏名功寂麟閣志堅鷗盟士
論有鬱疏訟陳湯彼哉媚疾於公何傷桑榆暮景又
值丙丁替子勤王愈見忠貞春秋之義有吟必形公
議之定必待百年賤爵酬勲立祠揭虔我撮其蹟以
篆穹石有來千億過者必式

愛勤堂趙公守墓遺墟碑

嗚呼此全義治南十里之水回里鐵阪洞故孝子愛
勤堂趙公廬墓遺墟也公名秀彬字士宗楊州人趙
氏著自高麗文剛公諱宋生爲我朝名臣公其十
一世孫也考諱秦衍妣清州李氏公生稟異質七歲

受小學至愛親敬兄之句問所以愛敬之道而知遵
行焉八歲而孤號擗若成人時當隆冬不處房室至
病冷成痼兄弟三人而公爲仲家甚貧菽水不繼於
偏慈公稍長勸兄持家勉弟就學而躬幹家務力田
致養甘旨畢具而祭祀賓客之奉從師應舉之費莫
不曰惟我在母病沐浴禱天割指進血以醫言四求
莘草根公乃採得方生嫩芽者於嚴冬積雪中而得
奇效及丁憂公年已六旬廬墓塊處哭泣無時有虎
相守三年不去此實求之於古亦所罕有者而其竭
力石儀於累世先塋盡心周恤於遠近宗族莫非推

於事親者也公沒幾年樵牧之過此者尚爲之指點
而咨嗟公之子榮教將樹石以表之屬余識之余惟
公之實行早晚安蒙 褒典而此亦所不可已者遂
略書之如此公之葬在於墓前相望一喚地而隔一
溪云

墓碣

昌平縣令李公墓碣銘

昔我先祖尤菴文正公與監司李公尚逸友善爲撰
其考縣令 贈兵曹叅判諱敏善神道碑稱監司公
之居喪有禮在官清慎而歎其家法之美同監司公

廬墓盡制者其季縣令公也諱尚達字汝昇李氏星
州望族其系詳于叅判公碑叅判公娶盧氏金氏金
氏考將仕郎對公及監司公金氏出也公以 宣廟
丙午三月二十二日生幼聰敏六歲能屬文從兄忠
肅公尚吉常撫頂曰此兒必大吾家光海數倫叅判
公挈家踰嶺居于善山公年十一旌軒張先生來訪
叅判公見公應對周旋如成人大奇之叅判公三子
長早沒公與監司公共一小齋極其湛樂而養親必
有酒肉延致親賓務悅其心朝夕之供躬自檢視當
瘠憂嘗藥情天丙寅遭外艱哀毀幾滅性送終居憂

之節一遵朱文公家禮後喪亦如之丁丑虜難忠肅
公殉節于江都公聞之慟甚曰余自幼服習固知其
有立人臣之義當如是矣死亦可喜公富於文詞筆
法亦妙累不利於省試及案判公沒不復應舉杜門
研經每朔望謁家廟招諸子姪諄諄教戒以奉親事
長之道應事接物之方焉 仁祖辛巳陰補 厚陵
叅奉例陞司膳寺丞事義盈庫直長丁亥以義禁府
都事出監高敞縣 上引見曰之縣將何先公對曰
誠恐不能願先興學及到縣四境置書齋擇訓長課
教之爲政以戢奸恤民爲務士民歌頌己丑因事棄

歸 孝廟庚寅除軍資監主簿時附麗于賊臣自黜
者多在朝講張眩亂公不樂供職遂決意南歸室于
洛東江上嘯詠自適壬辰除監察亦不就戊戌歲大
饑 特命除青山縣監勉赴任捐俸賑濟民無流
殍繡衣李公翊啓褒 上賜表裏以寵之辛丑棄官
而歸行橐只易經一帙而已邑人追思之立遺愛碑
顯廟癸卯除活人署別提旋移監察不就甲辰除軍
資監判官出爲昌平縣令病卒于官九月三十日也
遺命勿以官物斂牛車歸葬先人塋下諸子奉以窆
于金烏山下山所里叅判公兆左庚坐原里名肇自

公廬墓時公以寬厚慈良之性有孝友廉潔之行居家而鄉鄰推服莅官而吏民愛戴局於蔭塗不能展其所蘊而志未嘗少懈雖宦遊之日公退必繙閱經史至於夜分辭受去就必思其義休官則不免於艱食公可謂能守家法而不愧爲監司公之弟矣配昌寧曹氏梅溪先生之曾孫郡守胤禧之女生長法家有女士風先公歿後祔公墓生三男二女男長壘府使次叔通德郎次垌 贈承旨女適金世章吳相主俱無后志勉志勗郭世才金益寬柳泳金麗重長房子壻而側曲曰志漢志聘志膺志沆志文林蔚然翁

秦重安瓚次房子壻三房一男 贈祭判志學志勉
四男世玖世瓊曲后世璿世珞側出世璵武科志勗
一男世璿志漢一男世珙志聯三男世斌道淳道潤
志膺一男道泓志沆二男道涵道濂志學三男世璿
同樞世璣世璿側曲世玲世璿世玳世瑁餘不盡錄
六世孫克梓將樹碣于墓謁文於我再從叔性潭先
生先生肯許而未及滋筆乃以屬之余曰成吾師所
未成者非子而誰況吾家文字多出於文正老先生
之手乎余以不文辭不獲遂略撮其家狀而系之以
銘銘曰

金烏之麓穹然有碑是北峯兆尤翁銘之既述世閥
亦美家法孝友清白乃其浴襲惟公之賢是父是子
猗歟足法又有仲氏既翁而樂養生以禮廬墓盡哀
遵晦翁制仕從蔭塗去就不苟三佩縣符召父杜母
而其抱負奚止於斯樞歸自官送者涕洟遺命從葬
無愧先人我辭非諛刻此貞珉

湖城君李公墓碣銘

湖城君李公之歿在 萬曆甲午禮葬于楊州地後
三十二年乙丑以宅兆不利移窆于全州治北二十
里行止山渴鹿洞負壬之原舊有碣刊缺不可讀公

之後孫謀改豎他石使從余遊者惻然謁銘於余以
老病無文辭不獲謹按公諱柱字邦彥號寒村系幽
天潢世祖大王第三子德源君昭簡公諱曙其曾
祖也德源潛心正學尤邃於易禮又以勲勞策盟府
祖青鳧君諱藩與兄崇善君諱藻俱以道學見重於
己卯士類趙靜菴金冲菴諸先生皆與友善考林川
君諱鑛力學篤行克紹先徽妣縣夫人平澤林氏衆
判有名之女婦德克備宗黨咸稱之以嘉靖壬戌
七月十七日生公天姿粹美氣宇軒豁脫略綺紈承
襲詩禮重峯趙先生見而奇之勉以學問公益思奮

勵早夜孜孜日取洛閩諸書機索不已常以忠孝二字爲立身根基 宣廟初授湖城令逮壬辰亂大駕播遷三京淪陷公慷慨雲涕以恢復 宗社爲已任卽往湖南召募義旅又約同堂羣從並力討賊傾家財犒師激勵以忠義士皆感泣遂繕器械整部伍將赴 行朝賊勢彌滿道路阻梗以木道間關抵平壤屯賊數千直來犯前公勇力絕倫身先士卒奮擊斬數百級賊勢小挫遂倍道謁見行朝 宣廟握手泣諭至有忠誠貫日 祖宗默佑之語特陞湖城都正賜義兵將之號又慮孤軍難獨進使往順安與天

兵合勢公請於李提督如松欲出奇制勝提督慮其
輕挑大賊難之公奮然流涕曰吾宗戚之臣也豈可
計利鈍乎乃自爲先鋒與賊相搏斬獲甚多翌朝公
又誓師以必死無退之意血戰終日斬馘數千所獲
糗糧器械不可勝計賊遂潰遁乘勝追擊大小數十
餘戰皆以少敵衆未嘗敗衄屢度獻捷 宣廟下教
褒獎曰敵愾忠勇雖古名將無以過之賞賜銀緞公
悉以頒士卒翌年癸巳扈 駕還都卽陞封爲正義
大夫湖城君牌賜田民錄宣武一等勳明年四月十
二日勞悴成疾卒于私第壽僅三十三計聞 上震

附錄卷之八

悼輟朝厚庀喪葬遣近臣致祭 贈崇憲階元配縣

夫人驪興閔氏都事迪之女墓祔公左合封生二男

後配縣夫人安東金氏參奉禮元之女墓祔公右別

封無育男長懿性次宗性皆有陰階宗性當光海朝

除寢郎不就 西宮之變抗疏極陳倫紀大忤權奸

杜門晦跡而免生二子長敏華出爲懿性后次敏白

曾玄以下不能盡錄公容儀峻整言笑和易望之可

畏卽之可愛孝友兼備喜怒不形當事不計利害率

物不設畦畛服襲庭訓沉潛經學常曰知行二者如

車輪鳥翼然真知不易而篤行尤難知而不行有何

益哉此實精詣的確之論也嗚呼以公忠勇之姿英
睿之識天若假年以公則必當復樹大勳使丁酉再
猘之賊隻輪不返以私則亦當卒究大業使崇善家
傳之學遺緒益綿然則公之短於命實關時運而亦
豈非斯文之厄耶兵燹之後年代又邈著述廢佚事
行埋沒幾乎無徵尤可歎也遂撮略而爲之銘曰
劉宗正經行之門晉譙王忠義之節襲訓於過庭之
日學有淵源效誠於板蕩之際功存社稷偉其烈於
中興惜未究乎大業氣之清者數必局志何長而壽
胡齎肆我銘之不愧指千歲兮無泐

崔烈士墓碣銘

宣廟丁酉島夷再剽湖濱酷被屠戮州里士女皆奔
屏竄伏無一人敢嬰凶鋒制其肆突者有烈士崔公
挺身奮義與靈巖義士金德洽移檄列邑召募壯士
時公之妻吳氏只有一女而有身纔八月矣使族人
裝船載吳氏逃難于海島吳氏臨水欲自殺公神氣
自若曰天若有知必生男子不絕吾祀須善護腹中
兒勿致傷損也遂率家僮百餘名又募得願從者數
百人帶弓矢備刀砲據險于白年山遮絕賊路爲保
障計略設旗幟于山上又聚石成壘遇賊至矢石輒

俱下賊疑懼不敢逼東南士民賴以全活者甚夥賊
忽悉衆來圍公以少敵衆砲矢俱盡遂力竭以死卽
九月二十七日也公之奴幸而有獲生者潛藏公屍
寇退後葬于州南鰲山面絲洞坐庚之原是年十月
日吳氏果生男後幾年吳氏歿祔葬于同岡 肅廟
甲申公之曾孫雲翼以 靖陵寢郎籲于 駕前遂
蒙褒賞以忠臣旌其門鄉人至今稱之曰崔烈士云
公諱渙字士深其先慶州人中移于光山曾祖諱亨
漢掌令祖諱彥泓進士又移于羅州考諱春年叅奉
一男嶼卽生於海島者見錦城孝行錄女適林廷籌

孫伯起曾孫雲翮雲翼義禁府都事卽訟公蒙旌者
雲翮側出雲翔嗚呼昔韓文公敘張中丞徵于嵩公
之沒今二百有餘年矣無以徵公幸而公之同時同
閨人陳叅奉景文爲公遺腹孤記公當日事甚詳不
啻于嵩之口傳矣其言曰公兩親旣沒無意科場專
工學問又曰公嘗言士生天地間當以忠孝爲立身
之本公之本領旣如是則畢竟樹立安乎其卓卓矣
且公自矢以天不絕祀而報應果不爽則此非蘇長
公所謂天固可必者耶陳公之所以記蹟出於感激
忠義有補世教又可尚也是爲銘銘曰

維此絲洞枕庚之岡高四尺者烈士之藏我忘燕拙
揭此銘章後千百歲過者激昂

成均生員林公墓碣銘

公諱檜字永喬林氏系曲淳昌有諱仲沈高麗忠烈
王朝以密直副使從王如元以功封淳昌君卽公之
高祖也曾祖諱先味以麗季太學生當 聖祖龍興
與同志七十一人入一洞杜門同死 英廟辛未命
豎碑杜門洞御製詩刻而表之錄用其後孫 正廟
癸卯特命建祠於故都賜額表節遣官致祭祖諱用
培俾舉後南下貫鄉晦跡自靖考諱致之南部教授

娶和順吳氏兵使繼之女遂爲和順人公生於 戊

化甲戌 成廟丙午生員少有異質未成童見者輒

以公輔期之及長經傳子史過眼成誦不屑屑於舉
業以窮理講道爲己任與靜菴趙文正公投分相好
文正登庸之初慨然銳志於三代之治公獨憂之曰
孝直非無王佐之才但經事未熟從遊之士皆新進
少年鋒穎太露如此不已恐致後敗遊泮宮數年獨
不肯臧否人物人或以摸稜譏之笑而不答一日不
辭朋友浩然南歸不通洛下書信者五六年及北門
禍作公盡然私慟曰人之云亾邦國殄瘁文正之配

綾城也距公家僅十數里而公不往見時寄短札只敘寒暄不及時事及文正後命至卽馳到綾城文正夷然相接如平日但責以來見之晚因誦愛君如愛父天日照丹衷之句慘手告訣文正之喪過界公具奠幽哭哭甚哀人或危之公正色曰以此獲罪吾無憾焉遂杜門終世世謂之己卯完人事載本邑輿覽萬曆壬辰卒墓在和順南面同石洞負午之原配光山金氏長子鐵恭進士次子燧恭叅奉女適曹世英文科孫進士叢通政並贈領相崔天符長房之子若壻也叅奉墓主簿英次房幽曾玄以下不能

盡錄嗚呼已卯之禍尚忍言哉忠賢駢首士林喪氣
一世之碩德鴻儒非魚肉則廢錮而公見幾獨早其
愚不及似徐孺子不爲覈論同郭有道詩所謂既明
且哲者非公之謂也耶於乎賢哉公之後孫守秦從
余遊與其族姪成基圖所以不朽公者猥以墓文見
屬於余余老且病久謝筆研而不忍孤其勤意遂略
撮其家狀繫之以銘銘曰

歲在黃兔運值百六鬼蜮肆毒忠賢爲肉一呷湯水
彌天禍穽公獨遠引燭幾已炳心專撻索口絕雌黃
河凌魚爛鴻自冥冥同石之原四尺其藏猗歟微獨

邑誌可尋我銘無愧後人起欽

孤山全公墓碣銘

重峯趙先生門下多孝友節義之士而有爲先生之所獎許輩流之所推重者孤山全公是已公諱渫字時應管城人麗太祖朝太師忠烈公以甲爲上祖歷幾世至諱侑版圖判書封管城君寔公十代祖也考諱天性宣教郎妣興陽李氏直長頤壽之女公生於嘉靖癸亥稟質剛毅自齠齔已知事親之道人或饋美味必歸獻父母及長養生追遠克殫誠禮有足以感動鄉鄰者早遊趙先生門文理既通德業漸進先

生愛尚輒稱以吾時應又從學於挹清堂朴先生嗣
宗與李活溪大邑朴秘巖以恆相友善慕蘭亭古事
同一時諸名勝修楔於高塘公以楔中最少年作楔
帖序眷眷致意於白鹿洞規藍田鄉約遺芬賸馥至
今不沫爲鄉人之所艷慕當壬辰島夷之變重峯先
倡義舉其時道伯尹先覺逗遛觀望沮遏義兵公不
勝憤慨治一疏將上行朝而道梗未果復欲往赴
重峯先生于錦山而先生已殉節矣公以未得同死
爲平生根杜門自靖益不樂鄉土遂轉寓於尚州之
溪僻處自號孤山與蒼石李公垓同閑相講磨又與

李天默齋尚馨辨陸學頓悟末流之弊歎大明諸君
子不得踐實域公之志節之高趣向之正於此而槩
可見矣累登薦剡除濟用監叅奉 萬曆己酉十月
十九日卒得年四十七墓在沃川陽山之三政洞丑
坐原配密陽朴氏叅奉麟之女生子 嘉靖丙寅歿
于 崇禎丙子十月十八日祔葬公墓有三男二女
長吉承 贈掌樂正次顯承嘉善次孝承生員女適
李師曾梁九容吉承繼子命元 贈承旨女適生員
呂渭賢顯承三男長卽命元次命夏命逸孝承子命
九女適成必夏命元子始萬曾玄以下不能盡錄鳴

呼公之潛德懿行想多可書而兵燹之餘文獻無徵
世代既遠聞見莫逮性潭宋先生撰墓表推原公師
友之賢而全以未暇祠院爲後人慨恨此可以不朽
公而終乃躋享於鄉祠則又可見公論之終不泯矣
復何庸贅爲公之七代孫孝直來徵碣文余辭以不
能再三至請益勤遂強病略述而係以銘銘曰
早從賢師深蒙獎勵服勤其誠同死違計屏跡杜門
齋恨沒世斯足知公可略其細

副總管 贈兵曹判書申公墓碣銘

文武爲二道而有以武官有儒行者故副總管申公

命仁字存吾是已公平山人高麗太師壯節公諱崇謙爲鼻祖太祖桐藪之役效忠如紀信之誑楚勇世襲簪纓有諱君平集賢殿學士以清直著節入我朝齊靖公諱孝昌錄開國勳官典書至諱壽遐蔭補察訪不就始南下居仁同卽公之高祖也曾祖誠

贈叅議隱居行義壬辰之亂土賊肆掠環其里而不入曰仁人之所居也祖祐德 贈叅判早遊張旂軒

之門溪蒙獎與歿而祭於社考渾府使 贈判敦寧府事初娶星州李尚志之女後娶僉正治醴宋潑之女公宋氏出也生于 孝廟庚寅岐嶷異凡文藝夙

就且精於臨池屢發解輒不利於省試遂投筆取

肅廟癸酉科內而宣傳官訓練主簿判官都總都事

僉正經歷副正五衛將一兼將內禁衛將禁軍別將

及都總府副總管守禦中軍外而竹山茂山府使羅

州慶州營將安興防禦使慶尚水使南兵使兼北青

府使及全羅兵使其履歷也年八十六 英廟乙卯

四月一日考終于寢葬于府西斗巒之麓負丁之原

配昌寧成氏南畢之女先公歿墓在公墓南麓丑坐

以子益欽原從功追 贈公資憲大夫兵曹判書公

脩幹偉資甚有器局而早業文學內行兼備戊申庚

戊連遭內外艱初終葬祭之節克盡情文而守制六年哀毀如一日以早孤晚達祿不逮養爲終身恨每遇喪餘必躬執爨濯以致其誠晨謁家廟雖風雨不廢與羣兄弟處食必共案財不異庫而又以推之於敦宗恤窮其爲官也仁明廉勤至於糾盜不徒尚嚴而諄諄然諭以性善導以務農往往化爲良其在茂山城內故無井從城西引水爲瀆以便民且繕器仗廣儲蓄以備不虞愛人利物民懷其惠考滿歸請畱不得則勒碑以思安輿時沿海大颶民被灾將流散移粟捐俸以賑之一境賴以安堵上賜表裏一襲

以寵之以治盜神明特除慶州營將又以安興異績
追賜廐馬苟非公隨事殫誠何以蒙 恩褒全此哉
其在水營閱軍簿繕戰艦此所以安不忘危而其側
室之自官歸也繡衣搜裝湊歎其行橐蕭然蓋所至
有冰檠聲其自北臬還 朝賊臣鳳輝等搖撼 國
本構陷大臣戕殺善類卽辛壬禍也時獄事方張而
光佐爲推官公歎曰如我武夫旣無以正朝廷則豈
忍與羣小同朝遂辭職而歸武官而能如是其非達
牒之所罕聞者耶 英廟初服丈巖鄭文敬公丹巖
閔文忠公相繼入相擢公爲副摠管公赴 朝從二

公廷請誅鳳輝光佐等寒圃齋李文忠公嘗薦公將材及是兵判趙公道彬又以明直建白筵中特除全羅兵使未幾光佐喉臺論罷及拜守禦中軍凶黨潛相糾結謀危宗社公遂絕意世路歸臥鄉廬日以

經史自娛引誘後進從學者衆間以草屨野服治畦灌圃以適其意戊申逆亂大起湖嶺震盪公北望不勝憂憤子益欽以忠州營將將赴陣乘間一日夜馳三百里來覲公怒責曰汝爲守圉之臣此豈來覲之日耶須亟歸陣以殉國也益欽泣辭還陣卒以功錄勲義方之教亦足以知其所存矣二男長益三郡守

次卽益欽二女適成纘徵金德容其爲河沆李料縣
監趙尚綏妻者側幽也孫男府使瑜璫幽繼璞女適
李後承側幽適李慶臨長房幽擧適李敬和張受範
側幽瑛次房幽曾玄以下多不能盡錄嗚呼公居家
行義莅官政績實有過人者而其律已清約服食輿
乘無異寒素嘗訓子弟曰吾兄弟叔姪五仗閭節盛
滿可懼當抑浮華敦素質毋失本分此又經生學士
之所難能且其升沉實隨世道之汙隆尤可尚也已
公之墓尚闕顯刻五代孫周應從我遊請余銘甚勤
輒忘其蕪拙而謹副之銘曰

於乎公乎儒不能武武不能儒既武既儒我銘不誣

學生閔君墓碣銘

君諱鍾天字孟健閔氏系幽黃驪高麗尚衣奉御稱
道始顯自是名公賢卿史不絕書國初畱守審言歷
事五朝端廟遜位退居而終三傳至勳孫登第
仕不達師事寒暄堂語在南秋江師友錄又六傳至
任重受業于兩宋文正公以學行贈持平於君爲
六代祖高祖同樞漢龍曾祖僉知百采祖通德卽聖
懋父進士致孝以文行世其家妣慶州金氏學生漢
鴻女打愚李文穆公翔外曾孫也以辛卯四月二十

九日生君幼穎秀嘗在王父抱王父索眼鏡時尚未
解語而匍匐下膝手指其掛處七歲侍母夫人病晝
夜扶護無異成人及長遇新物不先嘗晨昏之際善
下柔微諫雖善病而在父母傍不見其痛楚色推而
友于於弟妹自知讀書不煩教督文藝夙成十五六
歲時已淹貫經史百家於功令之業若不留意而亦
甚敏速以親命屈首場屋而所好則不在焉雅性恬
澹於紛華雜技一切無所好惟耽翫圖史書籍操守
介潔舉止端重儼若老成人儕流咸愛敬之甲寅秋
發鄉解兩試翌年春赴南省以宿疾卒于漢師閏二

月八日也洛中士友莫不嗟惜三月十三日返窆于
所居公州沙場之案山負午之原人有慰譬進士君
者曰至清之資安不屑於衰世大到之器安不利於
衰門聞者悲之配延安李氏學生度英女竹窓忠穆
公時稷六代孫也柔嘉靜淑配德無違生先君三年
歿亦先君二年墓在政山洞坐酉之原東距君墓數
里生一男一女男永祿女適金俊泰後配開城金氏
士人文述女無育永祿三男四女男長鼎根具漢明
俞致儉壻也而餘幼嗚呼幼不遜弟長而無述者或
享期頤之壽而若君之孝友雅飭文而且才者竟夭

閔無成天意果何如也永祿以其宗老百運狀來丐
銘不忍終辭銘曰

苗而不秀聖人所嗟氣清數局理或有差噫彼堂封
閔氏才子我警樵牧用詔無止

墓誌

養新齋申公墓誌銘

公諱暉字明益種芭蕉窓前扁其齋曰養新平山之
申爲東方大姓祖於高麗太師壯節公崇謙而分派
各著有諱浩麗末以知申事擲璽抗節於禪代之日
我朝除戶曹判書不就諡忠簡自是世有聞人有

諱廷美中司馬兩試與兄翰林遵美著名己卯間

贈吏判是生庶尹諱黯以壬辰宣武原從勳 贈左

贊成其子寬一以白衣扈 駕錄勳三等察訪 贈

執義公其五世孫也高祖諱憤 贈吏議光海數倫

貽書斥絕爾瞻與弟 贈寺正忔屏居于安東之九

潭曾祖諱命龜薦學行除 英陵叅奉不就 贈承

旨祖諱鎮盛年不勝喪 贈叅判考諱思億德性仁

厚言議正直大爲士友鄉黨之所愛慕敬服官同樞

號拙菴寺正公之曾孫而幽后焉妣 贈貞夫人金

氏松崖先生文貞公慶餘玄孫疎翁一運女公生于

英廟己巳八月六日兄弟五人公爲季公以雅靜之
姿襲家庭孝友事父母愛敬備至侍側未嘗有疾言
遽色有不安節衣不解帶藥必躬煎周旋於伯仲之
間不遑暇食父母所愛雖雞狗之賤不聽家衆叱咤
毆擊與諸兄處不惟怡怡致其恪謹自少至老如一
日得一美味必先進團語終日無欹側伯氏澹窩公
亟稱其友于之篤蓋其至性不待踐跡而然也澹窩
公以急遽議斥土土瘠不得售公請以己田之人所
欲者換之曰兄有急而弟不顧可乎况析著之土其
本宗也澹窩公義而聽之幼警敏甫四歲一聽鄭松

江關東詞於人而輒盡誦之及就學不煩課督而文理日進未成童其所作已爲有藻鑑者所稱賞拙菴公詔之曰門戶不振盍爲之計公遂從事於功令之學而亦知有大於此讀書務揆索微奧爲文必根據義理不專爲應舉而已於經傳用功最在於庸學至於心經近思家禮啓蒙凡程朱文字皆劬劇嗜炙而尤以大全語類爲終身家計沉涵翫索老而彌篤我東先賢最尊尚沙尤二先生論說經禮必取衷焉始弱冠在甥館婦黨有以通經自負而著有成書者邀公宿幽示之公閱盡無一言可否其人固請之乃引

程朱說洞辨之其人憮然曰吾今日乃知妄矣不敢復言經義也公見識之明自少爲人所敬服已如此乙巳遭內艱攀擗之餘泣告于諸兄曰一於哀而未盡喪禮將遺恨千古豈孝於親之道也遂於襲歛殯葬之節一遵家禮克盡情文既葬議于伯氏廬于墓側兄弟替守以終三年壬子外憂亦如之而凡喪祭禮之舊或從俗者請釐正于伯氏伯氏信公精詳而一從之公非大病朝夕之祭晨昏之哭未或不參衰經雖盛暑亦不暫脫足跡不及中門而講喪禮外不接人談笑人亦不敢舉汗漫說話於其側焉既闋制

不忍遽退私第與兄司諫公處宗家夾室每朝展謁于廟伯仲叔三兄皆以毀歿公不堪孔懷之痛每道語其平日言行於子姪輒嗚咽涕下公以受拙菴公命雖不敢廢舉亦不以得失爲心害孳孳進學惟曰不足性理羣書靡不貫穿自有所謂湖洛是非凡有心性論議互相譏斥或有以滯泥病公者而公若不聞惟守吾之定本明吾之實事以自樂其所樂於諸儒先同異之論必叅伍勘究辨之不措嘗拜過齋金先生講質中庸諸義至夜分過翁已就枕遽起曰古之人有忘年友無以吾十年長也蓋深許之也公之

爲實如此故其守於身而行于家者有可以範俗居
家非上衣不入於內雖子姪侍側族黨後生來謁必
整衣冠相對性命源委典禮象數徬及國朝故實告
語娓娓曰非謂汝曹能信得及欲其習於耳也宗姪
早歿子幼公以爲先人舊居不可無主遂入處而撫
孤授業課僮檢家恩意周遍法度修整實有人所不
能及者公愛誦古人寧可忍餓而死不可苟利而生
之語事物不經於心財利不談於口而董理先墓石
儀備送遠代歲祭纖悉周詳殫竭誠力以外家貧甚
無以祭祀積備經紀買置祭田先行三位仲房獨有

香火之憂公議于堂內爲之區劃謀置位土蓋其推
於孝者如此又以及於宗族恤其饑餓助其婚喪俱
有條理而仍爲久遠之圖朔望早起謁家廟仍遍拜
生家祠堂祁寒暑雨未嘗或廢家人閱其勞引朱子
七十老而傳爲說公正色曰先君子九十且如是今
我筋力猶可強而敢言老耶教子姪皆本諸身而卞
義利甚哲二子俱有文其赴公車常勉以修人待天
而戒戒隨俗奔競不許率入換手於省園平居語不
及朝廷是非於黨論亦然而義理所關所守牢確嘗
曰辛壬忠逆之辨吾家之所世守也對人言輒明張

痛說義形於色。儒林間有事於辨誣討逆，皆屬公草疏。亦推以爲首。公毅然不辭，直前自任。至見忤於鄉鄰而不悔也。公詩文馴雅典贍，金判書相休嘗主試嶺南，以中庸鬼神理氣爲疑問，而擢公所對置。上游後對司諫公稱歎其學識之精，到所著有同異攷辨禮辨庸學啓蒙解疑太極辨人物性辨心性理氣辨一原異體辨中和說人心道心形氣性命說，纂三百解並雜文爲幾卷，藏于家。卒于今。上壬午七月二十三日，享年七十四。配成氏副率，晚徵之曾孫師傅爾鴻之孫，學生宗柱之女祖曾兩世俱以儒行著名。

六歲八歲連喪考妣釋齒孤子而事異顏致其孝撫
幼弟盡其誠既行尊章稱其德行姊姒悅其柔和祭
祀賓客無違夫子之意勸課勉戒不失教子之義晚
年猶績訓諸婦以由怠入勤由勤入怠之難易蓋其
資性幽類而家法之有自來亦不可誣矣生先公一
年歿先公七年公歿遷窆祔左于新穴龍宮縣馬嘶
峴之午坐原也二男光賓光實長房男在璜無育而
夭取族人子錫蘭爲後女適成在正趙宇淳次房二
男長在璉一幼女適朴在矩金錫初李敏元嗚呼公
行諡足以興起末俗而未獲褒顯經術足以裨益治

化而終見遺逸豈不可惜也哉公已病矣而猶不輟
溫釋曰意緒忽忽有朝暮慮未死前卒業何可已也
又修改其所嘗著述者以至於考終前日公眞朱子
所謂不爲其無名而沮不爲其無利而止者而其日
新不已儘不負旃櫓之意矣公沒未葬士論峻發以
公爲行遠學之不可泯沒狀于營邑越六年戊子乃
登聞而事下吏曹壬辰銓長李光文筵稟而特
贈司憲府持平於是乎公議得伸而焚黃之日遠近
士友來會者累百人苟非景服之有素何以如是余
以公從甥愛慕之深實有異於人者今於光賓誌文

之托不敢以無文辭而拙陋之甚不能揄揚德美之
萬一可愧也已銘曰

經禮之學孝友之政世莫我知守分安命和厚接人
乃其德性論及義理其辭勁正搜索之工老而彌力
性理羣書靡不究極妙契盈篋孰窺閫域百載之下
可以考德我綴蕪辭以誌于墓百不舉一諛非其懼
成均生員孟公墓誌銘

公諱性淳字子定孟氏籍新昌高麗侍中諱理其始
祖也三傳至諱希道與圃治諸賢爲道義交麗季政
亂退居溫陽之五峯山下講劄經傳尤邃於易學者

稱東浦先生居喪致白烏之異麗末 國初皆旌表
其門閭寔生左議政文貞公諱思誠佐我 世宗致
太平以清白著國乘累傳至諱世衡文科府使尤菴
宋先生撰其碣又三傳至衛率諱淑夏鄉黨稱其厚
德卽公之高祖也曾祖諱揆大通德郎祖諱趾遠號
玩乾齋考諱欽中號雪岡文學行誼見推重於士友
心齋宋先生狀其行過齋金先生誌其墓妣安山金
氏朝奉大夫命祚女孝敬有閨範以 英廟庚辰六
月二十一日未時生公于金谷里第容儀雅潔姿性
警敏雪岡公敬養有法度使讀書寫字外不知有他

事及長華聞甚著十六冠而聘過齋金先生其婦黨也一與相見深加期許又往拜性潭宋先生自是之後歲輒一再出入於函丈之間見識操履已有過人者癸卯丁金夫人憂戚易兩盡壬子登上庠遊泮雅飭通敏儕流皆以爲不可及癸丑喪配甲寅丁外憂內無主饋而躬執饋奠盡其誠禮服闋謝舉業專讀朱子封事栗谷聖學輯要等書時西學熾蔓公深憂之作闢異論以斥之且致意於禮學有所疑難輒以叩質於性潭先生朴諭善聖源所編禮疑類輯行于世而印本甚數公謀於同堂俱紙本謄出以資其講

習考訂知舊有行初虞於山上者公以書辨之曰虞者安神之義祭祀之始而行於神返室堂之後者也
不返魂而先行虞是先祭祀而後喪禮也其可乎栗
谷全書之重刊也有子號名編甲乙之論公聞之以
爲苟非三竄餘孽則孰不欲推尊栗谷而子號之稱
非後生末學所敢輕議欲援例於宋子大全則有不
然者宋子之稱其非遵上教者耶其言議之精詳
審慎類如是矣家甚貧而於辭受甚不苟雖親友之
周急亦或有不受者平生不喜千人嘗與李晉州魯
在從容李語及知舊千囑之非公曰此不可以一槩

論也苟非害義者干囑亦何傷李曰若無傷則兄何獨不爲乎公曰吾適無可囑之事故耳李笑而歎服公有二弟仲早夭有一子質甚魯公至誠教誨俾紹儒業季業明經恆在山房公竭力餽糧使之專意三房同居四壁蕭然而恩義篤至門內無蓋底之方圓先世一祀之節墳菴重葺之役殫心經紀無有遺憾宗族之會或有爭端求辨質於公公未嘗遽分其曲直矣其憾怒之稍弛據理曉譬使之間之俾歸于正在鄉黨亦然嘗自謂曰吾若甘草蓋百藥之性得甘草而導和故云嘗有儉摘園柿者公戒家人勿迫呼

謂曰柿與身孰重犯此極危於昏夜也須徐徐下去勿致墜傷此數者人所難能而可以見慈良之心也愛護先世遺蹟嘗曰他人之好文名筆孰如吾先祖之遺墨乎雖片言隻字得之必葆藏焉值周甲晦辰不許家人設酌前期往留雪岡公楸下日必拜墓以致倍悲痛之意焉不事著述遇會心處則必陶寫有詩文若干杏藏于家公素患痰喘至丁亥冬尤劇是年十一月二十二日向午命從子文述取紙筆來手書清白孝友無忝四百年家聲十一字使揭壁上舉目頻視遂就席竟以是日未時考終享年六十八明

年二月六日葬于天安郡金洞亥坐原就元配壙右
而合封焉元配光山金氏沙溪先生後孫斗燦女婦
道甚備生二子三女長男仁述次義述出后長女適
俞明煥次二天繼配德水李氏宗秀女生三女長適
尹顯德次適金商臣季適鄭海必仁述娶宋庚相女
生一女適李濟春再娶元鎮厚女生一子三女幼義
述娶李章和女生一子燾俞明煥一子致麟尹顯德
二子幼燾娶沈宐人女生二子嗚呼公孺深家庭觀
感師友言論和平文章典雅宗黨薰其德鄉鄰服其
行過齋先生嘗曰孟君可謂有成規者也此非可以

知公者耶余猥忝觀善之末各緣貧病雖不得源源
而所以傾嚮之者實不尋常今於幽誌之托何忍以
病昏無文辭遂爲之銘曰

遠紹東浦近述雪岡溫良愷悌襲美趾芳金洞之原
山回水長宰如四尺君子之藏衛人之禮同穴斯藏
有來千秋樵牧勿傷

學生琴君墓誌

君名錫老字永叟年三十五而沒于 崇禎四庚寅

十一月十五日其父汝聖甫將以某月某日葬于郡
西茂種洞已向之原其王考兆下幾武以書來請爲

壙誌其辭甚悲余固不忍銘君知君溪者宜莫如余
又何忍辭君姿質淳心志正語其文藝則有遜於人
者而其所以自守實有人之所不可及焉琴氏系出
奉化高麗英烈公儀爲鼻祖有諱鳳儀樞衣於吾先
子尤菴文正公之門篤志力學文正公以水鏡二字
錫其齋號期勉之溪斯可知矣君其五世孫也曾祖
聲球幽后於從叔以商而爲繼高祖之宗性潭宋文
敬公爲書望水齋三字以勉其家聲祖宗烈從遊於
溪湖金文元公之門而蒙獎與早卒嗣爲后者其弟
景烈之男舜孝卽汝聖也娶晉州蘇洙秦女生君君

嘗曰吾琴累世不振在湖中又是孤族而人之知沃
川之有吾琴者蓋以吾祖水鏡公之早師大賢甚見
愛重故也爲後人者如或虧其行以忝之當如何哉
惟其如是故父母悅其孝順族黨樂其怡愉朋儕愛
其詳雅聞其病者莫不驚憂哭其逝者爲之悼惜嗚
呼此豈叔季之所可易得哉耶君娶密陽朴思曾女
有二男二女男魯洙餘幼君久從我遊所以相視者
不但以世好而已顧余衰病不能幽門不得與汝聖
臨壙一慟只略書此以塞其請悲夫

澹窩申公墓誌銘

成均進士澹窩申公嗣孫在述屬余誌公墓公吾母
從兄也外氏之孝友敦睦乃其家風而公醇心偉器
高才篤行又爲宗黨士友所敬重余實淺陋無文顧
以自幼服習有此委托懼不能闡揚其何敢終辭公
諱嚇字明健平山人高麗忠臣太師壯節公諱崇謙
爲鼻祖其後有諱浩擲璽抗節於我 太祖受禪時
本朝除戶曹判書不就諡思簡有諱黯官庶尹 贈
贊成清陰金文正公撰墓碑是生諱寬一白衣扈
駕龍灣案原從勳三等察訪 贈執義是生諱愼昏
朝廢舉斥絕權姦遜于安東之九潭世稱處士 贈

吏曹叅議是生諱命龜叅奉不仕 贈承旨文巖鄭

文敬公撰墓碑是生諱鎮盛年不勝喪 贈戶曹叅

判娶打愚李文穆公翔女無子嗣爲後者再從弟鎬

第三男思億號拙菴官同樞公之考也過齋金先生

撰誌銘妣慶州金氏松崖先生文貞公之玄孫疎翁

一連之女以 英宗甲寅十月六日生公于忠州樓

巖里第方二三歲文巖鄭先生見而稱賞公眉宇秀

朗材器超凡忠厚孝悌之性藹然已有端緒矣公未

就學金承旨若行適來欲試公才授千字文日數百

字不多日盡卷而誦之甚熟稍長文思日就同樞公

嘗遠遊數旬當還計日出題俾作課業公從同隊遊
若不經意及操筆數日而盡成其贍敏蓋如此同樞
公嘗曰吾出外而歸書冊器玩不易故處八席牆壁
少無塵汙此子其可教矣事父母務承順甘旨之供
先期措備未嘗乏絕父母手札雖片言隻字收藏無
失同樞公享期頤壽公年近六旬左右扶持暫不離
側不以己衰而少懈凡有外間異聞必以飭告以慰
涔寂與諸弟友于篤至尤於親側和氣洩洩嘗作海
山遊雖遇絕勝處以曠日離庭不爲之畱連而同伴
亦不敢強之嘗以慈癯躬往邀醫醫是士族而性驕

尤感公至誠乃曰老夫此腳未嘗隨人而出今當爲孝子屈此可以見公之爲孝也仲母李夫人病且老家甚貧甘旨未繼公朝晡苟得美味雖菜屬輒撤而送之是以家人往往先具一器送之然後進飯李夫人嘗曰惟余病廢堂內諸姪孫之來見者寒暄罷卽起惟某移時畱話慰我寥寂公之推於孝者又如此公早負重望親戚知舊莫不期以大闡四十一始取英宗甲午司馬而止命也遊於太學學中知名之士爭來求見凡有大議論必待公而後決弟執義腹登第時朝著分朋角立亦有中黨公謂曰士子曲身之初

趨向不可不審而不可以前頭利害爲念宗人大顯
嘗稱公曰忠厚過人而言論嚴正可畏乙巳丁內憂
廬于墓側曰此實朱子舊制而家大人暨伯父所已
行者吾當遵守且十五日之期易過則伸情之慟當
寓於此遂與諸弟輪次或守墓或歸侍几筵壬子外
艱廬制一依前喪禮一遵家禮而補以沙尤兩先
生定論練衰祭儀之或所差誤者一皆更定焉雖盛
暑未嘗暫脫經帶侍墓亦如之毀瘠骨立猶不進薑
桂此公居憂之槩也公居常渾厚若無圭角於淑慝
之別忠逆之分未嘗不嚴嘗語再從弟校理馥曰丙

午五月之事今日極變也德麟十條之疏先朝惡

逆也而懲討不行於凶善伸復乃及於賊麟名義掃地矣君見帶三司豈可無言遂自構疏以給而竟不得如意則深加慨歎西學之大熾也時相蔡濟恭陰護之人莫敢斥執義公適除獻納公爲之構疏深討蔡罪徑遞未果上公又以黨人之毀清陰祠爲花邪極變與士友倡重建于西礪之議疏凡三上後十年成命特下而仍賜額士林皆以爲盛典實基於丙申之疏此公明義之略也叅判鄭公履煥曰某友雖不幸不達其所樹立者實多矣公晚歲自號澹窩書揭

澹泊明志四字以寓意見世道嶮巇絕意進取得九
曲山水於閒韶雲溪之上築小亭扁以自閒次武夷
權歌十章揭之壁曰大丈夫生斯世進不能經綸一
世則退守邱壑徜徉於水石雲煙之間以終天年是
矣以嶺俗之轉益危險不欲久居凌意西歸而未遂
卒于癸丑四月十三日時未去喪享年僅六十嗚呼
公姿質之醇才具之美言議之正苟其需世宜多可
觀而竟沉淪以沒悲夫余識淺文拙無以揀揚公德
美之萬一只據公之得於家庭及長德諸公者則監
司姜公潤同樞公友也嘗語人曰余訪申友於樓巖

不遇而有童子自內而出接待如禮動止端雅問之
乃其長胤也幼少之年已能如此家庭教導之方可
見矣公弱冠往拜山水軒權公震應權公戚也以書
賀于公之先夫人曰某風儀舉止一見可知爲奇偉
人而言議之發越操執之堅確比之風儀舉止又過
之公言行見孚於人從遊洛下者幾年人無有訾議
者同樞公每曰長兒吾無憂矣公於過齋金先生晚
始相識而甚見敬重及公之沒爲之嗟惜曰叔季之
世不復見古之人性潭宋文敬公亦曰某友賢孝今
不復覩而深恨自閒亭記文之未及踐約公之平生

大槩於斯可徵其視世之名位隆赫而沒而無可稱
者果何如哉葬于龍宮申上面杏嶺下艮坐之原初
配延日鄭氏都事梅女丈巖先生曾孫壬子生甲戌
沒有女士行無育始葬于府西于音洞今 上庚午
孫在述奉遷合窆于公墓後配延安李氏副提學天
基後通德郎延範女端淑慈諒壺範咸宐生先公一
年沒後公十四年葬祔公墓右有二男光五光老光
五一男一女男在述女縣監宋欽成光老一男在達
內外曾孫幼不盡錄銘曰

才高不售器利莫試豐賦齎施天何意也絕念進取

寓興山水百載聞風有興起者篤至之行超邁之識
豈惟今世古難得些杏嶺之原其封四尺我銘無愧

無愧一作于壙

詔千億且

剛齋先生集卷之八



